

詞學叢書



陽春白雪卷第五目錄

瑞龍吟

龍山會

秋霽

金盞子

孤鸞

高陽臺

玉漏遲

倦尋芳

念奴嬌

風流子

喜遷鶯

倦尋芳

齊天樂

過秦樓

綠頭鴨

漢宮春

木蘭花慢

畫錦堂

隔浦蓮

洞仙歌

念奴嬌

聲聲慢

花心動

齊天樂

玉漏遲

法曲獻仙音

念奴嬌

風流子

瑞鶴仙

二

清夜遊

春歸怨

齊天樂

瑞鶴仙

二

摸魚兒

五

桂枝香

八聲甘州

永遇樂

滿庭芳

塞翁吟

意難忘

青玉案

風入松

祝英臺近

採桑子

玉樓春

柳梢青

菩薩蠻

阮郎歸

謁金門

朝中措

南鄉子

踏莎行

菩薩蠻

好事近

清平樂

小重山

菩薩蠻

眼兒媚

四字令

長相思 五

如夢令 二

玉樓春 四

陽春白雪卷第五

臨濮 趙 聞禮 立之選

瑞龍吟

清明日
觀競渡

吳君特

大溪面遙望繡羽衝烟錦梭飛練桃花三十六陂
宮睡起嬌雷乍轉去如箭催趁戲旗游鼓素瀾雪
東風冷濕蛟腥澹陰送晝輕霏弄晚洲上青蘋生處
鬪春不管懷沙人遠殘日半開一川花影零亂
屏醉纈連棹東西岸闌干倒千紅粧靨鉛香不斷傍
暝疎簾捲翠漣縐淨笙歌未散簪柳門歸懶猶自有
玉龍黃昏吹怨重雲暗閣春霖一片

龍山會

南豐登高

趙虛齋

重整登高屐羣玉峰頭萬里秋無極遠山青欲滴新
鴈過縹緲孤雲天北烟入小橋低水痕退寒流澄碧
對佳辰驚心客裏鬢絲堪摘風流晉宋諸賢騎省
龍山俛仰皆陳迹憑闌看落日嗟往事惟有黃花如
昔醉袖舞西風任教笑參差鳧舄但回首東籬久負
有誰知得

秋霽

盧蒲江

虹雨纔收正抱葉殘蟬漸老雲木銀漢飛星玉壺零
露萬里素秋如沐倚顰抱獨盼嬌曾記郎心目向豔

歌偏愛賦情多處寄衷曲
淒涼漫有舊月闌干夜
涼無因重照頰玉扇紈收鸞孤蠹損一番愁緒暗相
觸回首塞雲空鴈足露井零亂已是負了桐陰可堪
輕誤滿籬種菊

蒲江詞不
載此闕

金盞子

水仙

趙虛齋

得水能仙向漢臯遺珮碧波涵月藍玉暖生烟稱縞
袂黃冠素姿冰潔亭亭獨立風前柰香多愁絕當時
事琴心妙處難傳有誰堪說
歲晚渺無人更短景
繁雲天欲雪瀟湘烟水茫茫但萬里相思寒江空闊
殷勤折向梅邊聽玉龍吹徹丁寧道百年兄弟相看

晚節此詞與他本不同

孤鸞梅

前人

江南春早問江上寒梅占春多少幾點寒星細萬里
春風到幽香不知甚處但迢迢滿汀烟草回首誰家
竹外有一枝斜好記當年曾共花前笑念玉雪襟
期有誰知道喚起羅浮夢正參橫月小淒涼更吹塞
筦漫相思鬢華驚老待覓西湖半曲對霜天清曉

高陽臺落梅

吳夢旌

宮粉雕痕仙雲墮影無人野水荒灣古石埋香金沙
鎖骨連環南樓不恨吹橫笛恨曉風千里關山半飄

零庭院黃昏月冷闌干
壽陽空理愁鸞問誰調玉
髓暗補香瘢細雨歸鴻孤山無限春寒離魂難倩招
清些夢縞衣解佩溪邊最愁人啼鳥清明葉底青圓
並湖遊冶路垂隄萬柳翹塵籠霧草色將春離思暗
傷南浦舊日愔愔坊陌尚想得畫樓窗戶成遠阻鳳
箋空寄燕梁何許
淒涼瘦損文園記翠筦聯吟玉
壺通語事逐征鴻幾度悲歡休數鶯醉亂花深裏悄
難替愁人分訴空院宇東風晚來吹雨

玉漏遲

和趙立之

林玉谿

表民

又

史蘖泉

綠樹深庭院侵簾暝草沿砌幽蘚問訊餘芳糝逕碎
紅千點暗有芹香墮几認杏棟營巢新燕晴思軟春
光幾許費人裁翦梅陰地濕無塵但密袖薰虬靜
看詩卷半掬羈心似翠蕉難展花事因循過了漸愁
入薰風團扇屏晝掩屏上數峯青遠

後段第五句作
五字與諸家異

倦尋芳

張荃翁

端義

曉聽社雨猶帶餘寒尚侵襟袖插柳千門相近禁烟
時候鬢墜搔頭深舊恨臂寬條脫添新瘦卷重簾看
雙飛燕羽舞庭花晝誰共語春來怕酒一段情懷
燈暗更後卷畫屏山今夜夢魂還又愁墨題牋魚浪

遠粉香染淚鮫綃透待相逢想鴛衾鳳幃依舊

念奴嬌

李草堂

鏡鸞分影望天涯腸斷悄無紅葉幾度秋風吹翠被
一縷幽香難滅燕卜新梁花移別檻回首春如客歡
情何在綠楊空鎖愁色 可是今古風流小喬妹麗
只許周郎得金谷珠簾空百尺不礙夢魂飛入釵股
盟深舊緣未斷月有重圓日藍橋路近乘雲先問消
息

風流子

王樂道

沂祖

東風長是客簾櫳靜燕子一雙飛看花塢日高翠陰

護曉柳塘風細綠漲浮漪腸斷處渭城春樹遠江國
暮雲低芳徑聽鶯暗驚心事畫檐聞鵲試卜歸期
小樓凝竚地疎窗下幾度對說相思記得菱花交照
素手曾攜有新恨兩眉向誰說破芳心一點惟我偏
知休爲多情瘦却重有來時

喜遷鶯

馮深居

涼生遙渚正綠芰擎霜黃花招雨雁外漁村蛩邊蟾
含絳葉滿秋來路世事不離雙鬢遠夢偏欺孤旅送
望眼但憑舷微笑書空無語慵覷清鏡裏十載征
塵長把朱顏污借箸青油揮毫紫塞舊事不堪重舉

間濶故山猿鶴冷落同盟鷗鷺倦遊也便檣雲拖月
浩歌歸去

倦尋芳

翁時可

燕簾挂晚鶯檻迷晴花思零亂試覓娉婷日日傍湖
亭苑擲果牆陰窺駐馬采香深逕拋春扇醉歸來任
釵雲半落繡簾慵捲念燦錦年華如舊飛絮遊絲
縈恨難翦蜀羽無情早帶怨紅啼斷厚約輕辭寒食
夜行雲空繞梨花院莫凭闌正斜陽澹烟平遠

齊天樂

翁賓暘

孟寅

幽香不受春料理青青尚餘秋鬢凋曲碧隈烟梳露

浴甘與菰蒲共隱芳標幾迴看纓結丁香帶縈晴荇
恨水東流楚江憔悴亂雲暝 淒涼夢遊故苑縱妬
花風暴吹夢難醒豔李妖桃紆青佩紫爭似廣文官
冷塵波萬頃算誰是同心自憐孤影收斂風流素絃
清夜永

齊天樂

前人

紅香十里銅駝夢如今舊遊重省節序飄零歡娛老
大慵立燈光蟾影傷心對景怕回首東風雨晴難準
曲巷幽坊管絃一片笑聲近 飛棚浮動翠葆看金
釵半留春妬紅粉鳳輦熬山雲收霧斂迤邐銅壺漏

迤霜風漸緊展一幅青綃淨懸孤鏡帶醉扶歸曉醒
春夢穩

過秦樓

和美成韻

趙白雲

崇德

隱枕輕潮拂塵疎雨幽夢似真還斷鶯雛燕婉依約
年時花下試翻歌扇憔悴鬢怯春寒慢掠輕絲柳風
如箭甚陽臺渺邈行雲無準楚天空遠應喚覺當
日琴心祗今詩思惆悵客衣塵染釵留股玉鞵襲鈎
羅荏苒膩寒香變問訊多情別後笑巧顰嬌對誰長
倩但晚來江上眼迷心想越山兩點

綠頭鴨

利碧澗

登

晚春天柳絲初透晴烟點離懷綠房深處豔遊曾記
當年襯龍綃亭亭玉樹步鴛褥窄窄金蓮燒蜜調蜂
翦花挑蝶香雲微濕綠彎鬟嬉遊困倚郎私語還愛
撫郎肩共攜手海棠院左翡翠簾邊恨無情錦籠
鸚鵡等閒輕語花前昔相憐關山咫尺今相望咫尺
關山是妾心闌是郎意懶是郎無分妾無緣都休問
金枝雲裏何日跨金鸞深盟在香囊暗解終值雙鴛

漢宮春

九日登
豐樂樓

王□□

手撚黃花對西風無語雙鬢蕭蕭韶華暗中過眼零
落心交登臨把酒更誰伴破橘持螯惟只有湖邊鷗

鷺飛來如受人招
往事不禁重省料縮羅心
減香銷空向畫橋古樹猶繫輕橈西興渡口誤歸
幾信寒潮傷情處淡烟殘照倚闌人共秋高

木蘭花慢

史蘖泉

深

畫樓簾半捲倩誰覓鳳簫音記待月梅邊籠香酒後
私語屏陰忽忽佩珠暗解斷歸鴻消息兩沈沈前度
劉郎易老舊時飛燕難尋羅襟薄有淚痕侵釵股
暗黃金向寶奩密看綾箋小字長是驚心登臨漫勞
眺遠但青山杳隔暮雲深曾傍灣橋繫馬紫騮嘶度
平林

畫錦堂

牡丹

黃玉泉

麗景融晴浮光起畫玉如信意尋春一笑酒盃翻手
滿地祥雲寶臺豔蹙文綃帕郎官嬌舞鬱金裙嫣然
處況是生香微濕膩臉餘醺 煖烘肌欲透愁日多
還銷風動成塵細爲品歸雪調度與朱唇翠幃晚映
眞圖畫金蓮夜照越精神須拚醉回首夕陽流水碧
草如茵

隔浦蓮

荷花

前人

瑤妃香透襪冷竚立青銅鏡玉骨清無汗亭亭碧波
千頃雲水搖扇影炎天永一國清涼境 晚粧靚微

酣不語風流幽恨誰省沙鷗少事看到睡鴛雙
棹歌遙隔浦應催暝藕絲縈斷歸艇

洞仙歌

姑蘇舊臺在三十里外今臺在胥門上次潘紫岩韻

前人

吳宮故墅是天開圖畫縹緲層雲出飛榭隱隱樓空
翠巘水遶蕪城平疇迴點染霜林彫謝越來溪上
鴈聲切闌干似覓胥門怨吳霸屬鏤沈香溪斷夢散
雲空千年外等是漁樵閒話但極目荒臺鬱蒼烟衰
草裏又還夕陽西下

念奴嬌

題馬嵬圖

程楚客

武

蜀江城遠想連雲危棧接天窮處惆悵烟塵回首地
雙闕舳舳猶故龍扈星聯羽林風肅未放鸞駝去不
堪掩面淚沾宸袖如雨 底事當日昭陽吹羌鳴羯
浣却霓裳舞三十六宮春滿眼曾把色嗔香妬芳草
埋情飛花隕怨翻被蛾眉誤畫圖驚見黯然魂斷今
古

聲聲慢

奚秋崖

秋聲淅瀝楚棹吳鞭相逢易老顏色桐竹鳴騷音韻
水雲空覓炎涼自今自古信浮生有誰禁得漫回首
問黃花還念故人猶客 莫管紅香狼藉蘭蕙冷偏

他露知霜識木落山空心事對秋明
白征衣塵易染算江湖隨人寬窄正無據
看寒蟾飛上暮

花心動

泊舟四聖觀

史蘄泉

肌雪浮香見梅花清姿漫勞疑佇淡粉最嬌羞把春
口長記壽陽眉嫵綠苔深逕尋幽地誰相伴凌波微
步翠鴛冷芳塵路杳舊遊何處不信重城間阻終
沒箇因由寄聲傳語寶炬凝珠綵筆呵冰密寫斷腸
新句月寒烟暝孤山下羞吟口斷橋邊去遮愁緒
青怎生畫取

前段第四句後段第七句原本俱少一字應補

齊天樂

王月山

夜來疎雨鳴金井一葉舞空紅淺蓮渚收香蘭臯浮
爽涼思頓欺班扇秋光萋萋任老却蘆花西風不管
清興難磨幾回有句到詩卷長安故人別後料征
鴻聲裏畫闌凭徧橫竹吹商疎砧點月好夢又隨雲
遠閒愁似綫甚繫損柔腸不堪裁翦聽著鳴蛩一聲
聲是怨

玉漏遲

趙立之聞禮號鈞月

絮花寒食路晴絲罥日綠陰吹霧客帽欺風愁滿畫
船烟浦綵柱秋千散後悵塵鎖燕簾鶯戶從間阻夢
雲無準鬢霜如許夜永繡閣藏嬌記掩扇傳歌翦

燈留語月約星期細把花鬚頻數彈指一襟幽恨謾
空倩啼鵑聲訴深院宇黃昏杏花微雨

法曲獻仙音

前段末句三字諸家俱屬下段作起句

前人

花匣么弦象奩雙陸舊日留歡情意夢別銀瓶限裁
蘭燭香篝夜閒鴛被料燕子重來地桐陰瑣窗倚卷
梳洗 蘭芳鈿自羞鴛鏡袖冷烟柳畫簾半倍淺
雨壓茶蘼指東風芳事餘幾院落黃昏怕春鶯驚笑
憔悴倩柔紅約定喚取玉簫同醉

念奴嬌

柴仲山

春來多困正日移簾影銀屏深閉喚夢幽禽烟柳外

驚斷巫山十二宿酒初醒新愁半解惱得成憔悴鬢
鬢雲鬢不忺鸞鏡梳洗 門外滿地香風殘梅零亂
玉糝蒼苔碎乍煖乍寒渾莫擬欲試羅衣猶未鬪草
雕闌買花深院做踏青天氣晴鳩鳴處一池昨夜春
水

風流子

方君遇

春被雨禁持傷心事髣髴去年時記芳徑暮歸褪妝
微醉暗幃先寢聞笑佯癡迴首別離容易過楊柳又
依依紅燭怨歌鬢花零落青綾牽夢屏影參差 桃
源今何在劉郎去應念瘦損香肌誤約夜闌從前怪

我多疑但怕收殘淚對人徐語指彈新恨推戶潛窺
還是慙慙病也無計憐伊

瑞鶴仙

趙立之

客邊情味惡花漏遠春靜風鳴鳳鐸空梁燕泥落映
柔紅微罨海棠簾箔愁鐘恨角怕催人黃昏索寞擁
吟袍凭煖闌干醉怯冷香羅薄阿鵲幽芳月淡紫
曲雲昏有人說著名繯易縛歸鞭杳誤期約計金泥
卜畫銀屏娛夜彈指忽忽恨錯爲情多攬盡芳春帶
圍瘦覺

又立春

前人

凍痕消夢草又招得春歸舊家池沼園扉掩寒悄倩
誰將花信偏傳深窈追遊趁早便裁却春衫短帽任
殘梅飛滿溪橋和月醉眠清曉 年少青絲織手綵
勝嬌鬟賦情誰表南樓信杳江雲重鴈歸少記衝香
嘶馬流紅迴岸幾度綠楊殘照想暗黃依舊東風霸
陵古道

清夜遊

越調

周彥良

西園昨夜又一番闌風伏雨清晨按行處有新綠照
人亂紅迷路歸吟窗底但餅几留連春住窺暗小蝶
翩翩等閒飛來似相妬 遲暮家山信杳奈錦字難

憑清夢無據春盡江頭啼鶉最懷苦薔薇幾度花
誤風前翠樽誰舉也應念留滯周南思歸未賦

春歸怨

越調

前八

問春爲誰來爲誰去忽忽太速流水落花夕陽芳
此恨年年相觸細履名園閒看嘉樹藹翠陰成簇
知也被韶華換却詩人鬢邊綠 小花深院靜旋
清尊自歌新曲燕子不歸來風絮亂吹簾竹誤文
凝望久心事想勞頻卜但門掩黃昏數聲啼鳩
起相思一掬

齊天樂

儲華谷

東風一夜吹寒食枝頭片紅猶戀宿酒初醒新吟未
穩凭久闌干留暖將春買斷恨苔逕榆階翠錢難貫
陌上秋千相逢誰認舊時伴 輕衫粉痕褪了絲緣
餘夢在良宵偏短柳線經烟鶯梭織霧一片舊愁新
怨慵拈象管待寄與深情難憑雙燕不似楊花解隨
人去遠

瑞鶴仙

徐南溪

暮霞紅映沼恨柳枝疎瘦不禁風攪投林數歸鳥更
枯莖敲荻糝紅堆蓼江寒浪小鴈來多音書苦少試
看盡水邊紅葉不見有詩流到 煩惱凭闌人去枕

水亭空路遙天杳情深恨渺無計訴與伊道漏聲催
門外霜清風細月色今宵最好怎割捨美景良時
閒睡了

又

陸景思

叙

濕雲黏鴈影望征路愁迷離緒難整千金買光景
疎鐘催曉亂鴉啼暝花悰暗省許多情相逢夢境
行雲都不歸來也合寄將音信孤迴盟鸞心在
鶴程高後期無準情絲待翦翻惹得舊時恨怕天
何處參差雙燕還染殘朱賸粉對菱花與說相思
誰瘦損

又用陸滋韻

黃澹翁中

睡餘拋倦枕憶篆鼎香銷起來慵整晴光破清冷正
柳黃梅淡染金勻粉茶甌雋永試經行桐花舊井記
前回未綠鷗波近日燕芹青盡因省春風如舊人
面何歸對時傷景樓高望迴潮有信鴈無準任相如
多病沈郎全瘦都沒音塵寄問便做無阿鵲頻頻可
能睡穩

摸魚兒

海棠

劉後村

甚春來冷烟淒雨朝朝遲了芳信驀然作暖晴三日
陡覺萬姝嬌困天怎忍潘令老不成沒個看花分才

情減盡悵玉局飛仙石湖絕筆辜負這風韻
傾城色懊惱佳人薄命牆頭岑寂誰問東風日暮無聊賴
吹得胭脂成粉君細認花共酒古來二字天猶吝
光去迅謾綠葉成陰青苔滿地做取異時恨

又次晁无咎

李文溪

做茅亭茂林環翠苔磯低蘸烟浦青蓑混入漁家社
斜日斷橋船聚真樂處坐芳草瓦尊濁酒頻頻注
臯禽自舞慣松逕衝雲梅村蹋雪朗笑自來去
乘車墜爭似修筇穩步前塵回首俱誤安閒得在中年好
抱甕尙堪蔬圃高眼翫算不識人間寵辱除巢許風

篁解語應共笑羣狙無端喜怒三四記朝暮

又

葉直庵聞

倚薰風畫闌亭午采蓮柔艣如語紅裙濺水鴛鴦濕
幾度雲朝雨暮遊冶處最好是小橋芳樹尋幽趣纏
簾低護任涼入霜紈月侵冰簾長夏等閒度都如
夢悵望遊仙舊侶遺踪今在何許愁子渺渺瀟湘浦
檻竹空敲朱戶黯無緒念多情文園曾草長門賦酒
酣自舞笑滿袖緇塵數莖霜鬢羞殺照溪鷺

摸魚兒

重過西湖

張梅深榘

又吳塵暗斑吟袖西湖深處能浣晴雲片片平波影

飛趁棹歌聲遠回首喚髮髯記春風共載斜陽岸輕
攜分短悵柳密藏橋烟濃斷逕隔水語音換思量
遍前度高陽酒伴離踪悲事何限雙峯塔露書空穎
情共暮鴉盤轉歸興懶悄不似留眠水國蓮香畔燈
簾暈滿正蠹帙逢迎沉煤半冷風雨閉宵館

又

登巖州西樓

柴秋堂

望

望長江幾分秋色三分渾在烟雨傷心已怕江南樹
那更暮蟬如語帆且駐試說看羊裘釣雪今何許魚
鰕自舞但一舸蘆花數聲羌笛鷗鷺自來去年年
恨流水朝朝暮暮天涯長歎飄聚衾寒不轉鈞天夢

樓外難歌白紵君莫訴君試按秦箏未必如鍾呂鄉
心最苦算只有娟娟馬頭皓月今夜照歸路

桂枝香

前人

今宵月色歎暗水流花年事非昨蕭灑江南似畫舞
楓飄柞誰家又唱江南曲一番聽一番離索孤鴻飛
去殘霞落盡怨深難託又腸斷丁香畫雀記牡丹
時候歸燕簾幙夢裏襄王想念王孫飄泊如今雪上
蕭蕭鬢更相思連夜花發柘枝猶在春風那似舊時
宋玉

八聲甘州

陳月境

芰荷風滌面恰麥秋應倒著春衣渡曉溪雲濕日流
塵脚露濕蛛絲調翼受風雛燕弱不解爭泥襯琅玕
錦院竹外薔薇立久闌干凭暖看行魚吹沫波暈
平池蘚痕斑礎石漸雨熟梅時傍短籬成團粉蝶掠
野花相逐口高低忘言處徽絃乍拂流水先知

永遇樂

爲張安國賦
焦尾集不載

韓南澗

池館春歸簾櫳晝靜清漏移箭山下孤城水邊翠竹
鷓鴣聲干轉記得年時綺窻人去尙有唾茸遺線照
珠筵歌檀舞扇寂寞舊家排遍青雲賦客多情多
病西掖桐陰滿院飛絮隨風馬頭月在翡翠帷空捲

平湖烟遠斜橋雨暗欲寄短書雙燕算猶憶蘭房畫
燭醉時共剪

滿庭芳

此詞宛有淮海風味惜不名世

劉吉甫

頌

鶯老梅黃水寒烟淡斷香誰與添温寶釭初上花影
伴芳尊細細輕簾半捲憑闌對山色黃昏人千里小
樓幽草何處夢王孫十年羈旅興舟前水驛馬上
烟村記小亭香墨題恨猶存幾夜江湖舊夢空凄怨
多少銷魂歸鴉被角聲驚起微雨暗重門

塞翁吟

千里和清真詞一集可取者僅此耳

方千里

暮色催更鼓庭戶月影朧臆記舊迹玉樓東看枕上

芙蓉雲屏幾幅江南畫香篆燼煖烟空睡起處繡衾
重尙殘酒潮紅 忡忡從分散歌稀宴少懷麗質渾
如夢中苦寂寞離情萬緒似秋後怯雨芭蕉不展愁
封何時細語此夕相思曾對西風

意難忘

和清真韻

朱用之

宮額塗黃怕牋凝怨墨酒漬離觴紅樓春寄夢青瑣
夕生香花氣暖柳陰涼棹曲水滄浪愛弄嬌臨流梳
洗顧影低相 桃花結子成雙縱題紅去後枉誤劉
郎琴心挑別恨鶯羽學新粧千萬恨惱愁腸便憔悴
何妨待共伊平消別後幾度風光

平消二字疑誤

青玉案

無名氏

年年社日停針線，怎忍見雙飛燕。今日江城春已半，
一身猶在亂山深處，寂寞溪橋畔。春衫著破誰針線，
點點行行淚痕滿。落日解鞍芳草畔，花無人戴，酒
無人勸，睡也無人管。

又和方回

姚志道

三年枕上吳中路，遣黃耳隨君去。若過吳江呼小渡，
莫驚鷗鷺，四橋都是，老子經行處。輞川圖上看春
暮，長憶高人右丞句。作個歸期天未許，春衫猶是小
蠻針線，曾濕西湖雨。

見東坡詞云和賀方回韻送魚
罔歸吳中

風入松

康伯可

又附田中行集

一宵風雨送春歸，綠暗紅稀。畫樓盡日，馮闌意與誰同。撚花枝、門外薔薇開也。枝頭梅子酸時。玉人應是數歸期。翠斂愁眉，塞鴻不到，雙魚遠恨樓前流水難西。新恨欲題紅葉，東風滿院花飛。

祝英臺近

史邦卿

柳枝愁桃葉恨，前事怕重記。紅藥開時，新夢又溱洧。此情老去須休，春風多事，便老去越難迴避。阻幽會，應念偷剪醪柔條，暗縈繫節物。移人春暮，更顛顛頓，可堪竹院題詩，薜堦聽雨。寸心外，安愁無地。

採桑子

朱野逸

藻

障泥油壁人歸後，滿院花陰。樓影沈沈，中有傷春一片心。
閑穿綠樹尋梅子，斜日籠明。團扇風輕，一行楊花不避人。

玉樓春

梅

劉隨如

鎮

泠泠水向橋東去，漠漠雲歸溪上住。疎風澹月有來時，流水行雲無覓處。
佳人獨立相思苦，薄袖欺寒脩竹暮。白頭空負雪邊香，著意問春春不語。

柳梢青

施芸隱

樞

飛露初霜，冷侵金井響。到銀床，懊恨碧梧，不留一葉

月占紗窗 鴈聲做盡淒涼又陡頓衾寒夜長曲曲
屏山重重客夢無限思量

菩薩蠻

李草堂 億

畫樓酒醒春心悄殘月悠悠芳夢曉嬌汗浸低鬟屏
山雲雨闌 香車河漢路又是忿忿去鸞扇護明粧
含情看綠楊

阮郎歸

王花洲 同祖與之

一簾疎雨細於塵春寒愁殺人桐花庭院近清明新
烟浮舊城 尋蝶夢怯鶯聲柳絲如妾情丙丁帖子
畫教成粧臺求晚晴

謁金門

趙竹潭 浦夫

天色晚雲外一箏斜鴈獨凭闌
千秋滿眼菊花寒尙淺
葉落香溝紅泛懶
把新詩題怨何處笛聲三弄
斷月遲簾未卷

朝中措

吳夢窓

晚粧慵理瑞雲盤
針線傍燈前
燕子不歸簾捲海棠
一夜孤眠
踏青人散遺鈿滿路
雨打秋千尙有落花
寒在綠楊未褪春綿

南鄉子

孫花翁

璧月小紅樓
聽得吹簫憶舊遊
霜冷闌干天似水
揚

州薄倖聲名總是愁
塵暗鷓鴣裘針線曾勞玉指
柔一夢覺來三十載休休空爲梅花白了頭

踏莎行

陳芸厓

壁

江濶天低樓高思迥春烟蘸淡如秋景今年芳草去
年愁分明又報明年信燕子還來歸期未定可堪
醉夢紅塵境世間萬事儘消磨水流不盡青山影

又

王萬之

柳外寒輕水邊亭小昨朝燕子歸來了天涯無數舊
愁根東風種得成芳草亭畔秋千當時歡笑香肌
不滿和衣抱那堪別後更思量春來瘦得知多少

又

錢若洲 六孫

征鴈雲深亂蛩寒淺驚心怕見年華晚蕭疎隄柳不
禁霜江梅瘦影清相伴 舞暗香茵歌闌團扇月明
夢遶天涯遠斷腸人在畫樓中東風不放珠簾捲

菩薩蠻

利碧澗

玉闌干外重簾晚流雲欲度長天遠花草不知名春
來各自春 綠鞍遊冶客何處垂楊陌不信不歸來
海棠花又開

又

劉叔儼 仙倫
招山

秦樓去了東風伴一川烟草無人管芳徑雨初晴黃

鷓鴣三兩聲
海棠花已謝
春事無多也
只有牡丹時
知他歸未歸

好事近

趙立之

人去綠屏閑
逗曉柳絲風
急簾外杏花微
雨冒春紅
愁濕單衣
催賜麴塵羅
中酒病無力
應是繡床慵
困倚秋千斜立

又

小枕夢催閑
飛雨時鳴高屋
掛起西窗人靜
聽春禽
聲續鴨塘溪
綠漲輕痕烟柳
媚新綠誰伴
瘦筇尊酒
弄崑泉飛瀑

清平樂

程楚客

曳雲搖玉裙
蹙秋綃幅
學得琵琶依約
熟貪按鴈沙
新曲
曲終滿院春閑
清輦移上眉山
心事怕人猜
破折花背插雲鬟

小重山

全前

香減鮫綃添淚痕
綵雲長是恨
等閑心玉笙猶記夜
深聞湘水杳寂寞
隔巫雲
翠被冷重熏
做成歸夢
了却銷魂垂楊濃處
著朱門
依然是風雨掩黃昏

菩薩蠻

曾蒼山

原一

淡黃斜日留汀草
簷低半露遙
岑小病眼不禁愁
闌

千無數秋 鴈聲何處落舊夢還驚覺風重葛衣單
深山吹笛寒

眼兒媚

黃東浦簡

畫樓瀕水翠梧陰清夜理瑤琴打窻風雨逼簾烟月
種種關心 當時不道春無價幽夢費重尋難忘最
是鮫綃暈滿蟬錦香沉

四字令

劉改之

情高意真眉長鬢青小樓明月調箏寫春風數聲
思君憶君魂牽夢縈翠銷香煖雲屏更那堪酒醒

如夢令

謝無逸

門外落花流水日
暝杜鵑聲碎
蕃馬小屏風
一枕畫堂春
睡如醉如醉
正是困天人氣

又

王聖與

妾似春蠶抽縷
君似箏弦移柱
無語結同心
滿地落花飛絮
歸去歸去
遙指亂雲遮處

長相思

康伯可

南高峯北高峯
一片湖光烟靄中
春來愁殺儂
郎意濃妾意濃
油壁車輕郎馬驄
相逢九里松

又

韓子暉
嘒

郎恩深妾恩深
祇爲恩深便有今
回紋辜舊吟
雲

沈沈水沈沈一點堅如百鍊金郎應知妾心

又

杜娘家謝娘家樓壓官橋柳半遮簾波漾彩霞拾
飛花怨飛花望斷郎來日又斜東風吹鬢鴉

又

夜蕭蕭夢蕭蕭又趁楊花到謝橋鳳沉明月簫來
迢迢去迢迢枉把唵牋寄寂寥飛鴻不受招

又

陳東甫

花深深柳陰陰度柳穿花覓信音君心負妾心怨
鳴琴恨孤衾鈿誓釵盟何處尋當初誰料今

玉樓春

徐山民

螢飛月裏無光色，波水不搖樓影直。每憐宿粉澹啼痕，懶把舊書觀字跡。枯荷露重時聞滴，君夢不來誰阻隔。妾身不畏浙江風，飛去飛來方瞬息。

又

李冰壺

于酉

紗窻春睡朦朧著，相見尙懷相別惡。夢隨城上角聲殘，淚逐樓前花片落。東風不解吹愁却，明月幾番乖後約。當時惟恐不多情，今日情多無處著。

又

利碧澗

夾簾不捲重堂暮，白騎少年何處去。雲根穉藕已勝

花烟外子松今作樹。金梯月澁知無與。寶瑟風驚
猶自語斜河。一道界相思。橫隔天心寒似霧。

又

陳雲厓

瓊奴家與章臺並路遠。可憐歸夢近。被頭浪語臉紅
潮鏡面頻思眉翠暈。年年花月年年病。花月無情
人有恨。欲將此恨寄湘流。又恐湘流流不盡。

陽春白雪卷第五終

人言此為樂孔則審時流又恐時流不盡

商賈而此以音聲量之半半亦月半半亦日無時

變矣矣此真喜並烈鼓而潮濤惡也

東雲垂

醉自語時回一首界賦掛於酬天公與如燕

金剛只此中

陽春白雪卷第六目錄

六州歌頭二

摸魚兒四

芙蓉月

三姝媚

夜合花

西窗燭

大酺

歸朝歡

多麗

滿庭芳

滿江紅

揚州慢

孤鸞

宴清都

徵招

齊天樂

祝英臺近

二郎神

綺寮怨

側犯

春聲碎

八聲甘州 四

八六子

瑣窗寒

桂枝香

華胥引

漢宮春

東風第一枝

渡江雲

慶清朝

小重山 三

點絳脣 三

戀繡衾 五

伊州三臺令

烏夜啼 二

拋毬樂

如夢令 二

醉太平

憶王孫

楊柳枝

昭君怨

長相思

四

望江南

三

謁金門

三

菩薩蠻

三

浣溪沙

六

搗練子

二

樓心月

三

陽春白雪卷第六

臨漢 趙 聞禮 立之選

六州歌頭

桃花 焦尾集不載

韓南澗

東風著意先上小桃枝紅粉膩嬌如醉倚朱扉記年
時隱映新粧面臨水岸春將半雲日暖斜橋轉夾城
西草軟莎平跋馬垂楊渡玉勒爭嘶認蛾眉凝笑臉
薄拂燕支繡戶曾窺恨依依 共攜手處香如霧紅
隨步怨春遲銷瘦損憑誰問只花知淚空垂舊日堂
前燕和烟雨又雙飛人自老春長好夢佳期前度劉
郎幾許風流地花也應悲但茫茫暮靄日斷武陵溪

往事難追

又謝人送牡丹

劉後村

維摩病起兀坐等枯株
清晨裏誰來問是文殊
遣名姝奪盡羣花色
浴才出醒初解千萬態
嬌無力困相扶
絕代佳人不入金張室
却訪吾廬對茶鐺
禪榻笑殺此翁癡
珠髻金壺始消渠
憶承平日繁華事
修成譜寫成圖奇絕甚
歐公記蔡公書古來無一自京華
隔問姚魏竟何如
多應是彩雲散劫灰餘
野鹿銜將花去休回首
河洛邱墟漫傷春
弔古夢繞漢唐都
歌罷欷歔

摸魚兒

懷雲厓陳乘車
東甫時游湘潭

譚明之

宣子
在庵

掩朱弦住聽金縷天涯同是羈旅多情記把香羅袖
殘粉半粘荆樹還信否便忍道石臺暗寂春無主分
明間阻那睡鳴噓雲翔鴛溜月此際更休語 人間
世誰識緘愁叢苦輕帆重解烟雨而今翻笑周郎誤
挑剔寒缸尋譜游倦處果因甚亭亭瘦影如前度無
由寄與待謝却梅花東風為我吹夢過淮浦

又梅

趙景周

與洽
懸庵

甚幽人被花勾引庭皋遙夜來去江空歲晚誰為伴
只有瓊枝玉樹愁絕處望萬里瑤臺夢斷迷歸路花

還解語更雪琢精神冰相韻度粉黛盡如土 飄仙
袂曾綴葢珠鸕鷀雲茵月障千步莫教衣袖天香冷
恐怨美人遲暮更起舞任斗轉參橫翠羽曾知否塵
緣自誤終待驂鸞乘風共去長作此花主

又

王與之同祖花洲

記年時荔枝香裏深紅一片成陣迎風浴露精神爽
誰似阿嬌丰韻黃昏他詞俱是八聲近望翠幕玳席粉面雲
鬢映嬌波微瞬向燭影交相歌聲閒繞私語畫闌並
佳期事好處天還慳吝鶯啼燕語無定一輪明月
人千里空夢雲温雨潤蕭郎病恨天闊鴻稀杳杳沉

芳訊日長人靜但時把好山學他媚嫵偷就眉峯印

又瓊花

施與言

柳蒙茸暗凌波路烟霏慘淡平楚七香車駐貌環掩
遙認翠華雲母芳景暮鴛鴦悄銖衣來按飛瓊舞淒
涼洛浦漸玉漏沉沉清陰滿地乘月步虛去銷凝
處誰說平安小杜翔螭聲斷簫鼓情知禁苑酥塵澆
羞與倡紅同譜春幾度想依舊苔痕長印唐昌土風
流千古人在小紅樓朱簾半捲香注玉壺露

芙蓉月

夫容

趙虛齋

黃葉舞空碧臨水處照眼紅葩齊吐柔情媚態竚立

西風如訴遙想僊家城闕十萬綠衣童女雲縹緲玉
娉婷隱隱彩鸞飛舞尊前更風度記天香國色會
占春暮依然好在閑伴清霜涼露一曲欄干敲徧悄
無語空相顧殘月澹酒闌時滿城鐘鼓

三姝媚

此詞平仄與諸家不同

杜子卿

花浮深岸樹迎新曦窗影細觸游塵映葉青梅記共
折南枝又及嘗新駐屐危亭烟墅杳風物撩人虹外
斜陽留晚鶯邊落絮催春心事應辜桃葉但自把
新詩徧寫脩筠恨滿芳洲倩晚風吹夢暗逐江雲慢
撚輕攏幽思切清音誰聞謾有鴛鴦結帶雙垂繡巾

夜合花

風葉敲窗露蛩吟
裝謝孃庭院秋宵
鳳屏半掩釵花
映燭紅搖潤玉暖
膩雲嬌染芳情香
透鮫綃斷魂留
夢烟迷楚驛月冷
藍橋誰念賣藥文
簫望仙城路
杳鶯燕迢迢羅衫
暗摺蘭痕粉迹都
銷流水遠亂花
飄苦相思寬盡春
腰幾時重恁玉驄
過處小袖輕招

西牕燭

雨霽江行自度

譚明之

春江驟漲曉陌微
乾斷雲和夢相逐
料應怪我頻來
去似千里迢遙傷
心極目爲楚腰慣
舞東風芳草萋萋
萎襯綠燕飛獨知
是誰家簫聲多事
吹咽尋常怨

曲儘教衿袖香泥浣君不見揚州三生杜牧待淚華
暗落銅盤甚夜西窗剪燭

大酺

牡丹

正綠陰濃鶯聲懶庭院寒輕烟薄天然花富貴逞天
紅殷紫疊葩重萼醉豔酣春妍姿浥露翠羽輕明如
削檀心鴉翼嫩似離情愁緒萬絲交錯更銀燭相輝
玉瓶微浸宛然京洛朝來風雨惡怕僂僂低張青
油幕便好倩佳人插帽貴客傳箋趁良辰賞心行樂
四美難并也須拚醉莫辭杯酌被花惱情無著長笛
何處一笑江頭高閣極目水雲漠漠

歸朝歡

趙白雲漢宗

翠羽低飛簾半揭寶簾牙牀涼似雪
牕虛雲母澹無風隔牆花動黃昏月
玉釵鸞墜髮盈盈白露侵羅襪
記逢迎鴻驚燕婉燈影弄明滅
蜀雨巫雲愁斷絕
羅帶同心留綰結交枝紅豆雨中看
爲君滴盡相思血染衣香未歇
夜闌天淨魂飛越正銷凝一庭秋意
烟水浸空闊

多麗

西湖

趙雲洞

時奚

歛吳雲翠奩推上紅晴渺澄流鱗光寒碎遠峰螺紺
低凝杏香引畫船影濕柳陰趁驕馬蹄輕橋限寬平

堤橫南北去來人入繡圍行漸際晚梅粧游困十里
曳歌聲蒼烟潤飛鴉妬春一夢催醒認名園當時
宴幸纜痕猶在危亭露花濃靜迎直砌霧蘚冷淡護
飛蕙幾對東風留連麗景年口口老越山青夜深月
照人依舊何處最關情歡娛地星移世換客恨還盈

滿庭芳

西湖宣
城園池

吳履齋

春水溶溶春山漠漠淡烟淺草輕籠危樓闌檻掠面
小東風又是飛花落絮芳草暗萬綠成叢閑徙倚百
年人事都在畫船中故園無恙否一谿翠竹兩逕
蒼松更有魚堪釣有秫堪舂底事塵驅物役空回首

社燕秋鴻功名已蕭蕭短鬢分付與青銅

滿江紅

滕王閣

全前

萬里西風吹我上滕王高閣正檻外楚山雲漲楚江
濤作何處征帆天末去有時野鳥沙邊落近簾鉤暮
雨捲空來今猶昨秋潮緊添離索天正遠傷飄泊
歎十年心事悠悠漠漠歲月無多人易老乾坤雖大
愁難著向黃昏斷送客魂銷城頭角

揚州慢

瓊花

趙虛齋

十里春風二分明月盡僊飛下瓊樓看冰花剪剪擁
碎玉成毬想長日雲階竚立太真肌骨飛燕風流斂

羣芳清麗精神都付揚州
雨牕數朶夢驚回天外
香浮似閬苑花神憐人冷落騎鶴來遊爲問左淮風
景長空淡烟水悠悠又黃昏羌管孤城吹起新愁

孤鸞

四明後圃石峯之下
小池之上有梅花

黃玉泉

冰心孤寂戀幾插靈峯半泓寒碧骨瘦和衣薄清絕
成愁極蕭然滿身是雪怕人知鏡中消息獨向百花
夢外自一家春色 記羅浮幽夢渾如昔有浸眼鯨
波倚雲丹壁夜醉空山酒叫裂橫霜笛回頭洞天未
曉但迢迢江南千驛飲散東風落月正海山浮碧

宴清都

胡伯雨

翼龍
蒙泉

夢雨隨春遠征衫薄短篷猶逗寒淺裁芳仁葉書愁
沁壁水牕竹院別來被篝梅潤暗塵積舊題紈扇許
多時閑了闌干放得蘚痕青滿誰念杜若還生蘋
花又綠不堪重口山程水記茶經硯譜共誰閑展湖
山舊會遊徧不怪得近番心懶恰今朝水落洲平江
上楚帆風轉調本一百二字此詞後段末句增
二字作六字一句宋人無此填

徵招

全前

蘋花又綠江南岸賓鴻帶將寒去幾許落梅愁渺暗
香何處一春長是雨剩費却翠篝沈炷冷隔簾旌潤
銷牕紙有人吟苦燕壘漬芹香畫堂永關心去年

情緒愁壓曲屏深更小山無數濺裙前事誤□□□
□□□□朱闌不了銷凝移損秦箏柱

齊天樂

重游番禺

丁無隱

兩株烟柳荒城外依依暮帆曾駐小扇障塵輕輿貼
岸誰料重行吟處流光暗度悵蘭溼春移葦汀秋聚
可柰清愁快呼艇子載將去 中年懷抱易感甚風
花水葉猶似孤旅伴鶴幽期隨鶯樂事還是情乖意
負衣塵帽土但杜鏡堪羞賀囊偏□待報山靈莫教
雲壑妬

祝英臺近

向莘老

希尹

曉簾櫳晴院宇空鳴冷沉水翠被欺寒嬌困未次
厭厭兩點眉峯一痕酒暈正人在溫柔鄉裏甚情
味羞對釵燕箏鴻胭脂暗彈淚欲寫吳箋無處問雙
鯉倩他輕薄楊花與愁結伴直吹到那人根底

二郎神

西施浣沙磧

周伯弼

浪花皺石颭夜月欲移還定想白苧烘晴黃蕉攤雨
人整斜巾照領剪斷鮫綃何人續黯夢想秋江風冷
空露漬藻鋪雲根苔發指痕環影重省五湖萬里
誰問烟艇料寶像塵侵玉瓢珠鎖羞對菱花改鏡
畧鴉黃破除螺黛都付渚蘋汀荇春醉醒暮雨朝雲

何處柳蹊花逕

綺寮怨

宮人斜弔古

石正倫

瑤林

綠野春濃停騎暖風飄醉襟漸觸目景物淒悲花無
語曲徑沉沉重檐繚垣靜鎖丹青暗斷軸塵半侵歎
絳紗玉臂封時何期掩夜泉流恨深已矣霜凋蕙
心蘭昌舊事雲容好信難尋竚立孤吟怕鳳履有遺
音今宵珮環奏月知倦客苦登臨驚飛翠禽松杉弄
碎影晴又陰

側犯

譚明之

宣子

素秋漸爽倚香曲枕情依舊懷袖浸數尺湘漪篔簹紋

皺悲歡盡夢裏玉骨從消瘦空又思太液芙蓉未央
柳 翔鳳何在樂府傳孤奏人病酒有鴛鴦雙字倩
誰繡拜月西樓幾聲滴漏應恐紈潔已疎郎手

春聲碎

南浦送別白度腔

前人

津館貯輕寒脉脉離情如水東風不管垂楊無力恣
雨顰烟窳一作賦闌干外怕春燕掠天疏鼓疊春聲碎
劉郎易憔悴况是恹恹病起蠻牋漫展便寫就新
詞倩誰寄當此際渾似夢峽啼湘一寸相思千里一作

攪一寸
相思意

人聲甘州

鄭南谷

夢協

大江流日夜客心愁不禁晚來風把英雄口氣興衰
餘事吹散無蹤但有山圍故國依舊夕陽中直北神
州路幾點飛鴻 欲問周郎赤壁歎沙沉斷戟烟鎖
朦朧聽波聲如語空亂荻花叢甚雲閒平安信少到
黃昏偏映落霞紅尊鱸美扁舟歸去相伴漁翁

又

送翁時可
如宛陵

陸雲西

景思

問纏腰跨鶴事如何人生最風流怕江邊潮汐世閒
岐路只是離愁白馬青衫往事贏得鬢先秋目送紅
橋晚幾番行舟 蘭珮空餘依黯便南風吹水人也
難留但從今別後我亦似浮漚敬亭上半林琴月記

彈將寒影落南州
秋聲裏塞鴻來後爲爾登樓

又孤山寒食

羅澗谷

甚匆匆歲月又人家插柳記清明
正南北高峯山傳笑響水泛簫聲
吹散樓臺烟雨鶯語碎春晴何地無
芳草惟此青青誰筦孤山山下任種梅
月冷薦菊泉清看人情如此沉醉不須醒
問何時變川歸去歎故鄉七十五長亭
君知否澗雲溪竹笑我飄零

又

胡蒙泉

甚年年心事占秋多
芳洲亂蕪生正小山已桂東籬
又菊秋爲人清腸斷洞庭葉下倚西風
誰可寄芳蘅

嫋嫋愁予處欲醉還醒
爲問素娥飲否自謫仙去
後知與誰明耿盈盈如此分影落瑤觥步高臺夜深
人靜有飛仙同跨海山鯨歸來也遠游歌罷失却秋
聲

前段第七句上多倚兩
風三字與諸家詞不同

八六子

鄭幼霞

熏初
小山

憶南洲紺波縈繞垂楊翠拂朱樓念十載風流夢覺
滿身花影人扶舊曾暗遊無言空愴離憂醉袖裊
將紅淚吟牋寫許清愁試與問楊瓊解憐郎否也應
還是舊家聲價而今豔質不來眼底柔情終在心頭
黯凝眸黃昏月沉半鉤

瑣窗寒

重游東湖
一字諸家俱用仄聲

起句第

蘇才叔

雲浦蒼寒烟堤羃翠舊痕新漲春愁十里冉冉碧絲
搖蕩記登臨少年思豪唾壺擊玉歌清壯到如今夢
裏秋風鴻陣晚波漁唱惆悵重來處望畫舫天邊
轡絲原上山陰秀句付與一聲雲響正東湖誰家柳
下午陰漠漠人蕩槳寂堪憐白髮周郎爲江山自賞

桂枝香

徐鼎夫

西麓

人間秋至對暮雨滿城沉思如水桐葉驚風似語怨
蛩齊起南樓月冷曾多恨怕而今夜深橫吹那堪更
聽蕭蕭槭槭透窗搖睡問楚夢閑雲何地但手約

輕綃省人深意紅樹池塘誰見宿粧凝睇舊時裘馬
行歌事合都歸汀蘋烟芷思王漸老休爲明璫沉吟
洛溪

華胥引

丁無隱 書塢

論交眉語惜別心啼費情不少蕙渺溱期蘋深汜約
輕誤了幾度金鑄相思又燕歸鴻杳誰料如今被鶯
閑占春早 頻把愁勾惜鷗雲嬌紅猶遶渾拚如夢
爭柰枕醒屏曉欲寄芙蓉香半握怕不禁秋惱重是
親逢片帆雙度天杪

後段第五句七字
較宋詞多一字

漢宮春

趙雲洞 時奚

霜皎千林正石橋人靜春滿橫塘寒花自開自落曉
色昏黃明沙暗草對東風深鎖閑堂金漏短江南路
遠夢回雲冷瀟湘重到舊時花下按玉笙歌徹月
正西廊亭亭愛伊素影粉薄新粧經年瘦損漫誰知
心事淒涼休更聽城頭畫角一聲聲斷人腸

東風第一枝

探梅

黃玉泉

迅影彫年嫩晴蕢煖意行問訊春色不知春在誰家
闖香幔攏玉勒一枝竹外似欲訴經年相憶奈情多
難剪愁來寂寞水寒烟碧 吟正女素多恨酒正
殢夕陽催客殷勤片月飛來更隨暗香細索橫斜瘦

影看盡未開時消息爲春來還怕春多腸斷夜闌霜
笛

渡江雲

和清真

蕭鶴皋

元之體仁

流蘇垂翠幺高低一色紅紫等泥沙香山居士老柳
枝桃葉飛梗屬誰家好音過耳任啼鳥怨入芳華心
情懶筆牀吟卷醉墨戲翻鴉堪嗟雕弓快馬敕勒
追蹤向夕陽坡下休更憶青絲絡轡紅袖裁紗司空
見慣渾如夢笑幾回索葦吹葭山中樂從渠恣賞鶯
花

慶清朝

木夫容 宋
詞俱押平韻

李敏軒

宏模
希膺

碧玉雲深彤綃霧薄芳叢亂迷秋渚重城傍水中有
吹簫儔侶應是瓊樓夜冷月明誰伴乘鸞女仙遊處
翠帟障塵紅綺隨步 別岸玉容竚倚愛淺抹蜂黃
淡籠紈素嬌羞未語脉脉悲烟泣露綵扇何人妙筆
丹青招得花魂住歌聲暮夢入錦江香口歸路

小重山

曾蒼山

原一子實

薄雪初消銀月單疎疎浮竹影矮紅闌梅花夢事落
孤山禁人處霜重鼓聲寒 留取曉來看斑簾低小
閣燭花殘一帆明月去滄灣空相憶雪浪月痕翻

又

黃乙山

鑄亦顏

涼入秋檐雨意長竹深啼絡緯響虛堂一枝燈影耿
昏黃疎簾外風度木樨香心事易成傷燕支坡下
路語如簧定仙螺子玉釵梁鴛屏夢應到舊韋郎

又

陳伯可成之

恨入眉尖鬢不開日高猶未肯傍粧臺玉郎嘶騎不
歸來梁閒燕猶自及時回粉淚汚香腮纖腰成瘦
損有人猜一春那識下香堦春又去花落滿蒼苔

點絳脣

宋蘭室自道
吉甫

山雨初晴餘寒猶在東風軟滿庭苔蘚青子無人見
好客不來門外芳菲徧難消遣流鶯聲轉坐看芭

蕉展

又

蘇竹里

茂才

竹翠藏烟杏紅流水歸何處透簾穿戶更灑黃昏雨
織錦題書誰寄愁情去渾無緒綠楊千縷不似真
眉嫵

又

朱堯章

堦

繡被鴛鴦寶香熏透薔薇水枕邊一紙明月人千里
宿酒初醒全不忺梳洗擡纖指微籤玉齒百色思
量起

戀繡衾

趙叅晦

汝堦

柳絲空有千萬條繫不住溪頭畫橈想今宵也對新月過輕寒何處小橋玉簫臺榭春多少溜啼紅臉霞未消怪別來胭脂慵傅被東風偷在杏梢

又

蕭大山

山則則山

倚闌閑看燕定巢舊彈箏因病久拋畫不盡殘眉黛被東風吹在柳梢曉來暗理傷春曲把金釵枕畔細敲書寄與天涯去并相思紅淚一包

又梅

趙白雲

江烟如霧水滿汀早梅花偏占淺清倚翠竹寒無力想瀟湘斜日暮雲幾回夢斷陽春面問百花猶隔

幾塵趁月夜霜風峭約綵鸞同載玉笙

又

趙雲洞

迢迢江路日又曛為春遲長是怨春小立馬千林下
寄寒香歸贈故人相逢細說經年恨早匆匆吹散
霽雲算惆悵芳菲事粉蝶知應自斷魂

又

前

江南烟水幾萬重記玉人花底舊容待欲寄飛鴻信
望前山夕照冷紅塞笳月下聲淒楚怨百花春事
夢空倩誰共東君說把陽和分付朔風

伊州三臺令

楊東窻

詔和

水村月淡雲低爲愛寒香晚吹瘦馬立多時是誰家
茆舍竹籬 三三兩兩芳蕤未放瓊鋪雪堆只這一
些兒勝東風千枝萬枝

烏夜啼

潘紫崑

物 庭堅

無端小雪廉纖入平簷金鴨旋添龍餅莫開簾 尋
梅約開還落可曾怏合作一年春恨上眉尖

又

題月海星天觀卽
宋武所居故地

鄭幼霞

雲 初

春江一望微茫辨桅檣無限青青麥裏菜花黃 今
古恨登臨淚幾斜陽不是寄奴住處也淒涼

拋毬樂

李子我

肩 吾

風罨蔦紅雨易晴病花中酒過清明綺窗幽夢亂於
柳羅袖淚痕疑似飭冷地思量著春色三停早二停
如夢令
王師錫
竹上一樓嵐翠竹下一渠春水中有隱人居破屋數
間而已無事無事靜夜月明千里

又

楊季和

涼月薄陰猶帶紅豆一枝秋思門外幾重山山外行
人千里歸未歸未又是菊花天氣

醉太平

徐叔柔
夢龍

冰肌玉容情真意濃小樓幾度春風醉琉璃酒鐘

關山萬重何時又逢思量雨蹟雲蹤似襄王夢中

憶王孫

趙君舉

日長高柳一蟬聲翡翠簾深寶篋清夢遠春雲不散
情曉風輕玉棟花飛宿雨晴

楊柳枝

前人

淅淅西風生暮寒繡衣單碧梧葉落藕花殘恨前歡
月鏤虛櫺烟逗竹夢千山玉簫清夜憶孤鸞鎮長
閑

昭君怨

楊誠齋

昨夢扁舟花底香滿西湖烟水急雨打篷聲夢初驚

波
却是池荷跳雨散了真珠還聚聚作水銀渦瀉清

長相思

孫守之

雲一窩玉一梭淡淡春衫薄薄羅輕鬢雙鬟蛾
聲多雨聲和窗外芭蕉三兩窠夜長人柰何

又

譚明之

去路遙歸路遙燈月光中立小橋魂縈紫
蕭蕭雨蕭蕭此夜相思空寂寥梅花落麗譙

又

前人

淨亭亭步盈盈蟬影明綃傳體輕水邊無限情

尊傾翠鬟傾歸去如何睡得成西風吹酒醒

又

楊丞和韶父

溪水清溪水渾溪上人家數畝園垂楊深閉門
羅裙白羅裙採盡青蘩到白蘋江南三月春

望江南

陳東甫

芳思遠南苑惜春時翠柳枝柔金笛怨碧桃花老
笙悲風日正遲遲

又

趙君舉

新夢斷久立暗傷春柳下月如花下月今年人憶去
年人往事夢中身

又

趙行可

時行石洞

霜月濕人睡矮篷秋驚覺夜深兒女夢漁歌風起白蘋洲別岸又潮頭

謁金門

曾子實

梅粉褪點點雨聲春恨半吐桃花芳意嫩草痕青寸寸把酒花邊低問莫解寒深紅損等待春風晴得穩琵琶重整頓

又

譚明之

銀漏滴午夜平康巷陌雙掩獸鑲人語寂餘香無處覓回首舊遊蹤跡紺碧染衣猶濕一餉沉吟誰會

得月明春店笛

又

人病洒生怕日高催繡昨夜翻新花樣瘦旋描雙蝶
奏閑凭繡牀呵手却說春愁還又門外東風吹綻
柳海棠花厮勾

菩薩蠻

趙君舉

閑庭草色侵堦綠瑣窗午夢人如玉拋枕出羅幃風
吹金縷衣怨春風雨惡二月桃花落雨後縱多晴
花休春不成

又

蕭體仁

斷紅流水香難覓行雲一去無蹤跡楊柳漫遮闌閉
愁付遠山玉箏彈未了倚柱人空老青子摘來酸
酸心有幾般

又

郭口口

賣餛天氣簫聲軟午院水沈烟未斷睡起補殘眉紅
綿入鏡遲霎時開笑靨花上看雙蝶新月上簾鉤
相思不斷頭

浣溪沙

周伯弼

樸樸精神的的香茶蘼一朵曉來粧雛鶯葉底學宮
商著意勸人須盡醉扶頭中酒又何妨綠窻花影

日偏長

又

黃同武時龍野橋

雨歇花梢月正明
映簾人靜繡燈昏
鴛鴦成字便停針
笑啟玉奩明酒暈
緩尋金葉熨香心
一春情緒此時深

又

過高郵

譚明之

欲展吳牋咏杜娘
為停楚棹覓秦郎
藕花三十六湖香
珠顆翠檠饒宿淚
玉痕紅褪怯晨粧
小橋風月思淒涼

又

王敬子大簡

拂面涼生酒半醒
廉纖小雨晚初晴
過雲無定月虧盈
庭戶不關春悄悄
闌干倚遍夜深深
幾回風竹誤人聽

又

曾子隆

原隆月册

落日蒸紅山欲燒
短筇行藥過山腰
松聲隱隱晚來潮
矮樹依嵒無敗葉
梅花當路少全梢
水村時有短長橋

又

趙退齋

笑摘青梅傍綺疏
數枝花影漾前除
太湖石畔看金魚
筍指曉寒慵出袖
翠鬟春懶不成梳
爲君縫狹

繡羅襦

搗練子

無名氏

偏口戲最風流斗帳金猊暖不收
一陣蜜蜂狂絮裏
酒酣眠折玉搔頭

又

初酒醒乍衣單褪著裙兒側著冠
門外小橋寒食夜
月明人去杏花殘

樓心月

此調譜中不載

柳下爭拏畫槳搖水痕不覺透紅綃
月明相顧羞歸去
都坐池頭合鳳簫

又

手把新荷葉一枝喚來池上只愁歸流螢裏在紅紗
袖忽到持盃箇箇飛

又

新著生紅小舞衣案前磨墨誤淋漓含嗔逗晚不梳
洗背面牙床喫荔支

陽春白雪卷

陽春白雪八卷又外集一卷宋趙聞禮編次宋時名人之詞附以己作聞禮字立之又號釣月書錄解題云五卷趙粹夫編非完書也世鮮傳本魚魯之訛在所不免又無善本可校尋訪數年雖有鈔借得失互見未可據依爲斷其餘諸名家詞句讀押韻不同者條註於每句之下錯誤不能強通者空格以俟攷補詞至南北宋而極盛自草堂詩餘絕妙好辭花草粹編而外此選亦可繼響自揣聞見未廣聲律未諧質之當代諸公精音律而工於詞者糾正審定匡所不逮余雖不敏有厚望焉刻旣竣畧述數語於後

道光歲次己丑春三月既望穀雨日江都秦恩復跋

當升閣公辭音率而工似歸春糝玉審室玉衣不
蘇而代此數衣而繼響自微聞具未實響事未謂實
請至南北未而融盜自草堂表翁雖似以權於草堂
翁指氣神由之不論題不拍風動香空谷以文文而
良未何謝對為禱其餘諸各亦歸以龍甲與不同
而不及矣無善本何效無焉幾半雖有也昔斯夫可
云正谷欲辨夫諱非宗善也世無專本前營之非
人之歸附以与并聞甄字立之及然純且書繪雅
則春白澤八卷天秋某一卷宋德開觀編次宋世

陽春白雪卷第七目錄

憶舊遊慢

霓裳中序第一

花心動

梅花引四

蘭陵王三

玲瓏四犯二

水調歌頭

洞仙歌

揚州慢

念奴嬌

洞仙歌

滿庭芳令

驀山溪二

聲聲慢二

過秦樓二

齊天樂三

徵招

賀新郎二

鳴梭

解連環

瑞鶴仙

三

疎影

翻香令

摘紅英

夢江南

秋蕊香令

夜行船

虞美人

鬪雞回

更

踏莎行

二

鷓鴣天

三

謁金門

六

菩薩蠻

五

訴衷情

阮郎歸

四

畫堂春

一

南鄉子

溪山日給

朝中措

青門怨

少年遊

柳梢青

更漏子二

少年遊

採桑子

一叢花令

江城子令

漁家傲二

眼兒媚

霜天曉角五

大邑

大邑

大邑

大邑

大邑

大邑

陽春白雪卷第七

臨濮 趙 聞禮 立之選

憶舊遊慢

趙虛齋

賦東湖荷花再用方時父韻

望紅葉影裏冉冉斜陽十里隄平喚起江湖夢向沙
鷗住處細說前盟水鄉六月無暑寒玉散清冰笑老
去心情也將醉眼鎮爲花青 亭亭步明鏡似月浸
華清人在秋庭照夜銀河落想粉香濕露恩澤初承
十洲縹緲何許風引綵舟行尚憶得西施餘情裊裊
烟水汀

霓裳中序第一 末利咏

尹梅津

青輦粲素曆海國仙人偏耐熱餐盡風香露屑便萬
 里凌空肯憑蓮葉盈盈步月悄似憐輕去瑤闕人何
 在憶渠癡小點點愛輕縵 愁絕舊遊輕別忍重看
 瑣香金篋淒涼清夜簟席杳杳詩魂真化風蝶冷香
 清到骨夢十里梅花霽雪歸來也慙慙心事自共素
 娥說 按絕妙好詞餐盡上增早字輕縵作清絕與換
 頭短韻疊簟席作簟第杳杳上增怕字風蝶作
 蝶蜂

花心動 得於江西歌者
而不知名氏

粉蝶雲齊度清笳愁入暮烟林杪素艷透春下骨淒

涼勾帶月痕生早江天蒼莽黃昏後依然是粉寒香
瘦動追感西園嫩約夜深人悄 記得東風窈窕曾
夜踏橫斜醉携嬌小惆悵舊歡回首俱非忍看綠牋
紅豆香銷紙帳人孤寢相思恨花還知否夢回處霜
飛翠樓已曉

前後段六七句另押他韻與史邦卿周
清真吳夢窗趙虛齋諸詞不同另是一

體

江城梅花引

比世傳本差異而不知名氏
見程垓書舟詞

娟娟霜月冷侵門怕黃昏早黃昏手撚梅花無語對
芳尊酒又不禁愁未醒斷魂遠一更更斷魂 斷
魂斷魂空斷魂被兒裏香半温睡也睡也睡不穩誰

與温存惟有窗前殘燭照啼痕
深夜不眠聽畫角人瘦也比梅花瘦幾分

又

使北時和
李漢老

洪忠宣公

去年湖上雪欺梅月飛來片雲開
雪月光中無處認樓臺
今歲梅開依舊雪人如月對花笑
還有誰一枝兩枝三四蕊
想西湖今帝里綵牋爛綺孤山外
目斷雲飛坐久花寒香露濕
人衣誰作叫雲橫短玉三弄
微對東風和淚吹

洪皓詞三聲叶韻者每首
有笑字名四笑江梅引

又

無名氏

對花詩節不曾飲見花殘
任花飛小徑繁
龍一而受

春寒題破玉牋雙喜鵲香燼冷遶銀屏渾是山待
眠未眠事萬千也問天也恨天髻兒半偏繡裙兒寬
了還寬自取紅氍重坐暖金船惟有月知君去處今
夜月照秦樓第幾間

此趙汝光詞

又

趙蕙菴

單衾寒引畫龍聲雨初晴月微明竹外溪邊低見一
枝橫澹月疎花三四點尙春淺早相看似有情
夜來袖冷暗香凝恨半銷酒半醒靚粧照影未忺整雪
艷冰清只恐不禁愁絕易飄零待得南樓三弄徹君
試看比從前更瘦生

此亦三聲叶韻

蘭陵王

陳抑齋

角聲切何處梅梢弄雪還鄉夢玉井樓前千朶芙蓉
挿空碧隣翁問消息爲說紅塵倦客應憐笑弓劍旌
旗底事留人未歸得 淮山舊相識記急處笙歌靜
裏鋒鏑隋堤楊柳猶春色嗟十載人事幾番碁局青
油年少已鬢白漫惆悵京國 朱墨困無力似病鶴
樊籠老驥羈勒夕陽不繫棲林翼待添竹東圃種松
西陌功名休問吾老矣付俊傑

又 和清真

葉漁村 上則

大堤蘆嫋嫋游雲蕙若蘭舟上曾記那回拂粉塗黃

弄春色施鸞託傾國金縷尊前勸客陽臺路烟樹萬
重空有相思寄魚尺 飄零歎萍跡白懶展羅衾羞
對瑤席折釵分鏡盟難食看桃葉迎笑柳枝垂結萋
萋芳草暗水驛腸斷畫闌北 寒惻淚痕積想柱鴈
塵侵籠羽聲寂天涯流水情何極悲沈約寬帶馬融
怨笛那堪燈幌聽夜雨鎮暗滴

又 賦胡伯雨別業

劉賓王

此何夕天水空明一碧商量賦如此江山幾箇斜陽
了今昔荒臺步晚色沙鳥依稀曾識啼鶻外人遠未
歸江濶晴虹臥千尺 殘碑蘚痕積記當日清遊夫

君題墨碧瑤仙去蒼雲隔飛一鏡秋冷列屏天遠鷄
聲人語半郊邑寄情又江國愁寂怕聞笛正怨苦
溪猿飛倦汀翼陰陰翡翠迷津驛慨世事塵化吾心
形役清吟孤往渺醉影夜翠濕

玲瓏四犯

重過南樓
用白石體賦

譚在菴

宣子
明之

碧黯塞榆黃銷堤柳危闌誰料重撫才情猶未減指
點驚如許當時共伊乘乘字顧爲辭家怕吟鸚鵡袞

袞波光悠悠雲氣陶寫幾今古生塵每憐微步渺
江空歲晚知在何處土花封玉樹恨極山陽賦吹薊
扇底餘歡斷怎忘得陰移庭午離別苦那堪聽敲窗

東雨

又

劉葯房

之才
賓王

幾疊雲山隔不斷闌干天外凝眺秋與愁并梧逕雨
 痕先表嬌夢半握芙蓉奈曲曲翠屏深窈問愁根當
 年誰種漠漠淡烟衰草 鴛鴦懶拂蘋花影記眉嫵
 縈情多少輓轡玉虎牽絲轉聽盡秋釭曉算誰念臥
 雲衣冷香壓金蟾小寫新詞先寄江鴻歸去且教知
 道此詞後段第五句七字第六句五字與諸名家詞
 第八句四字與
 史達祖詞同

水調歌頭

利碧澗

登

日月換飛澗風雨老孤松千巖萬壑秋重白氣接長
空一笑掀髯徐起蒼珮腰間相照猶自湧晴虹桑海
幾番覆人尚醉春風橫白石結綠綺送飛鴻十年
夢事消歇長劍吼青龍却笑人間多事一殼蝸涎光
景顛倒死英雄雲日空濛裏玉鶴任西東

洞仙歌

全前

弄香吹粉記前回酒困綠露沉沉轉花影翠簾深隱
隱紅霧依人荷月靜新樣雙鸞交映如今誰念省
短雨長雲曾託琵琶再三問最苦綠屏孤夜久星寒
無處頓風流心性又莫是偷香寄韓郎到漏泄春風

一枝花信

揚州慢

和趙虛齋瓊花

鄭覺齋

弄玉輕盈飛瓊淡泞襪塵步下迷樓試新粧纔了炷
 沉水香球記曉剪春冰馳送金瓶露濕緹騎星流甚
 天中絕色作中被風吹夢南州尊前相見似羞
 人蹤跡萍浮問弄雪攀枝無雙亭上何日重游我欲
 纏腰騎鶴烟霄遠舊事悠悠但憑闌無語烟花三月
 春愁

念奴嬌

全前

捲簾酒醒怕無言慵理殘粧啼粉記綰同心雙繡帶

珠箔青樓花滿琢玉傳情斷金訂約總是愁根本誰
知薄倖肯於長處尋短 舊日掌上芙蓉新來成刺
變却風流眼自信華年風度在未怕香紅春晚恩不
相酬怨難重合往事冰澌泮分明訣絕股釵還我一
半

洞仙歌

胡蒙泉

半欄花雨是夜來凭處夢過溪橋逢柳住亂鶯聲殘
酒醒正是關情山枕上吟就回紋錦句 歸鴻應別
浦綠漲瀾茫早近湖陰喚船路覽芳菲歌窈窕獨立
莎根剩一掬閑情凄楚欲待折微馨寄相思又生怕

相思帶將春去

滿庭芳

同前

愁徹檐花吟枯硯海日長多費茶烟懷芳心苦持此
過年年雨外飛紅何許應流到采綠洲邊銷凝處別
離情緒正是海棠天吹花題葉事如今夢裏記得
依然料歸來鶯居春後燕占人先誰念文園倦客琴
空在懶向人彈愁何極楚天老月偏是到窗前
後段第四句較他詞多二字

驀山溪

劉菊房

醉魂離夢捻合難成片惡味怕黃昏更西風梧桐深

院蟬鬆翠嫵記那日相逢情繾綣語玲瓏人靜凌波
見香雲曾約念阻題紅怨應是綠窗寒也思郎雲
衣誰換郎今銷黯步楚竹江空雲縹緲水瀟茫不抵
相思半

又

史可堂

危欄看月番做聽秋雨一滴一聲愁似相伴離人悲
苦籠香袖冷獨立倚西風紅葉落菊花殘都是關情
處如何排遣賴有高陽侶長嘯酒壚邊且同賦秋
娘詞句山翁醉矣一笛小樓空思往事看孤雲目斷
征鴻去

聲聲慢

五日

劉葯房

湘雲織玉楚葛篝香澡蘭簾幙風靜怨抑難招沈魄
當年獨醒莫唱江南占調念天涯深情誰省時暗換
最秦樓惆望歸期無定曾是榴裙誤寫怕照眼枝
頭絳綃花竝巧篆盤絲午鏡綠窗閑影香蒲也應細
剪但年年斷雲愁冷迎醉面看銀蟾飛浴露井

又

和陸景思黃木香

羞朱妬粉染霧裁雲澹然蒼珮仙裳半額蜂粧莫道
梳洗家常碧羅亂縈小帶翠蛟寒一架春香清思苦
倚晴嬌無力如待韓郎密幄籠芳吟夜任露沾輕

袖月轉空梁弱骨柔姿偏解勾引詩狂遺鈿碎金滿
地恨無情風送韶光閒晝永看青青垂蔓過牆

過秦樓

曾月朋

子隆

曙色開晴輕颺敷暖日影才經簷角倦來芳徑且倚
闌干觸地新愁粘著長日如年可堪恨雨絲絲夢雲
漠漠見鳴禽遞響乳鶯梳翅癡愁方覺凝望處初
綠呈新陳柯拆舊忘了一春歸却不傷花老只怕花
開解使朱顏銷鑠寶扇輕搖亂拋花片教飛迎風低
掠忍重携素手驟覺一分瘦落

又

利碧淵

眉黛山分靨朱星合郁郁夜堂初見芙蓉寄隱葦葦
傳香便許翠鬟偷剪迎夜易羞欲晨先怯風流□□
未慣正流蘇悵掩綠玉屏深紅香自暖 誰信道媚
目難留驚雲易散從此三橋路遠巢燕春歸剪花詞
在難寄紅題一片料想伊家如今羞傍琴窗慵題花
院但碧桃影下應對流紅自歎

齊天樂

全前

淡雲荒草秋汀暮歸心又寒烟水論檻移花量船載
酒寂寞當年情味孤蓬夜閉聽四壁松聲欲高還細
似近如遙露鴻聲亂楚天外 藍橋人斷歲久舊家

會共賞九華花事艷雪初融生香自暖消得金蓮貼
地相思破睡謾一點琴心暗關千里愁怯潮生曉帆
風又起

又和翁時可悼故姬

曹松山 逢

翠簫聲斷青鸞翼心期被釵誰表夜燭銀屏春風粉
袖猶記琵琶斜抱瑤池路杳恨巫女回雲月娥沉照
謾說蓬萊玉環花貌夢難到巖花亭院乍冷更蛩
吟風碎鴻飛烟渺綠玉彈碁紅牙按拍樂事歡情終
少劉郎未老要鬢翼堆元腕酥凝皓莫忘香薦綠羅
裙帶草

前段被釵
二字有誤

又

柴秋堂

望

淒淒楊柳瀟瀟雨
悄窗怎禁滴瀝思
裏傳蟹愁邊落
鴈多少東吳山色
知他恨極料爲我
窗前強鳴刀尺
竟日西風那堪無
寐更隣笛
黃花開徧未也
花開
應笑我年少難覓
灞上長安河邊渭
水都把韶華暗
擲何人碎璧尚衰
草連天暮烟凝碧
怕說相思撼楓
暄夜寂

徵招

梅

李草堂

翠壺浸雪明遙夜
初疑玉虬飛動莫
弄紫簫吹墮寒
瓊驚夢把紅爐對
擁怕清魄不禁霜
重愛護殷勤待

長留作道人香供 塵暗古南州風流遠誰尋故枝
么鳳謾舉目銷凝對愁雲矇矓向霞扉月洞且嚼蕊
細開春蕚這奇絕好喚蒼髯與竹君來共

賀新郎

憶鶴

蒼蘚粘溪路悵山君翛然羽化夢坡何許曾約秋雲
縈客袖舞傍吟臯硯塢矯清唳裂穿雲宇江碧空濛
無處問問孤山梅底人知否烟夜永耿心語 瑤華
一去成幽阻倚修篁抱琴愁絕天寒日暮城郭悲歌
華表恨此事銷凝千古有招隱小山能賦蕙帳空兮
誰夜怨算課騷讀易俱婁楚步深窈墮松露

賀新郎

袁宣卿

曉色明窗綺篆煙銷寒生翠幄烏啼人起昨夜西園
新雨過細草閒花似洗漾藍影柳塘春水晴晝雙飛
歸來燕正東風緩緩臨桃李還又是醉天氣同廊
小院簾垂地恨連天芳草淒迷短長亭外愁到春來
依然在舊事還如夢裏又生怕人驚憔悴何處樓頭
吹羌笛向曲中說盡相思意三弄罷寸心碎

鳴梭

自度

譚明之

織綃機上度鳴梭年光容易過縈縈情緒似水烟山
霧兩相和謾道當時何事流盼動層波巫影嗟峨翠

屏牽薜蘿 不須微醉自顏酡
如今難恁麼燭花銷
艷但替人垂淚滿銅荷
賦罷西城殘夢猶問夜如何
星耿斜河候蟲聲更多

解連環

姑蘇懷古

三表器奚秋厓

鬢髮新掠正風回浪影時
搖城脚歎天涯春草無倫
似凝竚當時柳顰花弱步
錦珠沈謾一瞬千年如昨
信龍樓鳳閣無奈都由笑
歌休却斜陽柳邊自落
聽幽禽兩兩沙際評泊
道世間多少閒愁總輸與扁
舟五湖遊樂便買蓑衣
又生怕魚龍風惡把從前萬
事對酒且休問著

瑞鶴仙

曹松山

爐烟銷篆碧對院落秋千晝永人寂濃春透花骨正
長紅小白暈香塗色銅駝巷陌想游絲飛絮無力念
繡窗深鎖紅鸞虛度禁烟寒食空憶象牀沈水鳳
枕屏山殢歡尤惜粉香狼藉海棠下東風急自秦臺
簫咽漢臯珮冷斷雨零雲難覓但杏梁雙燕歸來似
曾舊識

又

余樵隱

玠夫

怪新來瘦損對鏡臺霜華零亂鬢影胸中恨誰省正
關山寂寞暮天風景貂裘漸冷聽梧桐聲敲露井可

無人爲向樓頭試問塞鴻音信
爭忍勾引愁緒半掩金鋪
雨欺燈暈家僮困臥呼不應
自高枕待催他天際銀蟾
飛上喚取嫦娥細問要乾坤
表裏光輝照子醉飲

又 和丁基仲

得趣居士周氏

畫樓簾捲翠正柳約東風搖蕩
春霽細桃雨才洗似粧臨寶鏡
脂凝鉛水雲偏髻子墜釵梁
羞看燕壘最堪憐錦繡香中
早有片紅飄砌閒記琴彈古
調曲按清商舊年時事屏山
畫裏江南信夢中寄感春濃
懷抱午醒初解淺酌依然又
醉傍闌干猶怯餘寒倦

和袖倚

疎影

催梅

施芸隱

樞知言

低枝亞實望翠陰護曉幽夢難覓
凄楚霓裳瓊闌瑤臺經年暗鎖清逸
春風似怪重門掩未許入玉堂吟
筆想壽陽却厭新粧倦抹粉花宮額
還記孤山舊路未應便負了波冷蟾
白莫寄相思惟有寒烟伴我騷人閑
寂東君須自憐疎影又何待山前雪
積好試敲羯鼓聲催與約鼎羹消息

翻香令

鄔文伯

醉

醉字蘇詞平聲

和春恨拍闌干寶香半炷倩誰翻
丁寧告

陽春白雪

卷七

十三

東風道小樓空斜詞仄聲月杏花寒 夢魂無夜不

關山江詞仄聲南千里霎時間且留得鸞光在等歸

時雙照淚痕乾

摘紅英

趙參晦

東風列紅梅拆食列切畫簾幾片飛來雪銀屏悄羅裙

小一點相思滿塘春草 空愁切何年徹不歸也合

分明說長安道簫聲開去時驄馬誰家繫了

夢江南

前人

簾不捲細雨熟櫻桃數點霽霞山又晚一痕涼月酒

初消風緊絮花高 閒處少磨盡少年豪昨夢醉來

騎白鹿滿湖春水段家橋濯髮聽吹簫

秋蕊香令

詞譜無令字

黃乙山

花外數聲風定烟際一痕月淨水晶屏小欹醉枕院
靜鳴蛩相應香銷斜掩青銅鏡背燈影寒砧夜半
和鴈陣秋在劉郎綠鬢

前後段第三句第六字應作平聲

夜行船

黃野橋

十四弦聲猶未斷星月上西墻一半却手休彈含情

微妬報道春宵短銀燭紗籠須早辦不住地金蕉

催勸別院人歸小窗燈靜自把花枝看

此詞名雨中花令花草粹

編以兩結句五字者為雨中花六字七字者為夜行船兩調相混宋人多誤刻

虞美人

前人

捲簾人出身如燕燭底粉粧明艷羯鼓初催按六么
無限春嬌都上舞裙腰 畫堂深窈親曾見宛轉楚

波如怨小立花心曲未終一把柳絲無力倚東風詞此

兩仄三平而句調與虞美人不同張泌臨江仙句調與此詞同而平仄不換韻

鬪雞回

夾鍾商○此詞譜中

杜龍沙

鶯啼人起花露眞珠灑白苧衫青驄馬繡陌相將鬪
雞寒食下 回廊暝色悒悒應是待歸來也月漸高
門猶亞悶剔銀缸漏聲初入夜

踏莎行

前人

波煖芹汀風香蘭圃清塵幾點茸茸雨畫船絲竹載
梁州綵旗繩板歡遊女 脩禊初三禁烟百五年華
恰到風流處一生只當百回春一回春到休輕負

又

無名氏

殢酒情懷恨春時節柳絲巷陌黃昏月把君團扇卜
君來近牆撲得雙蝴蝶 笑不成言喜還生怯顛狂
絕似前春雪夜寒無處著相思梨花一樹人如削

鷓鴣天

前人

題得相思字數行起來桐葉滿紗窗秋光欲雨碁聲
瀉粉帳不容花露香 新寂寞舊疎狂玉爐消息記

錢塘小闌立徧紅蕉樹一帶殘雲趁月黃

又

胡蒙泉

六曲銀屏夢隔雲半分鸞影匣生塵別來可是春愁
覺試著輕衫不貼身風月夜短長亭也須聞得子
規聲歸時莫看花梢上但看芳洲綠淺深

又

利碧澗

鳳尾鬟香再疊梳藕絲衫嫩蹙雙魚閑收末利熏藤
枕自插芙蓉遠翠幙新浴後淺粧初衛夫人帖學
行書西窗一霎黃昏雨笑問新涼飲酒無

謁金門

杜龍沙

階露重浥透尋花雙鳳
天色清明風不動薄衫金絡
縫
午枕高雲斜縱一覺風流春夢起看翻翻簾影
弄夕陽歸燕共

又

李仲敏

好古

花過雨又是一番紅素燕子歸來愁不語舊巢無覓
處
誰在玉關勞苦誰在玉樓歌舞若使胡塵吹得
去東風侯萬戶

又

無名氏

趙參晦

休說起嚼破白桃花
盡人在夕陽深巷裏
燕兒來也未
一樣半紅半紫
雙鳳同心結子
分在郎邊郎不

記爲郎今折碎

又

陳雲厓

春晝永接葉鳴禽相應風定落紅香一逕疎疎窗竹
影寂寞年時酒病遠笛悠悠吹醒閉上層城天又
暝雲山青不盡

又

鄭覺齋

秋夜永葉葉梧桐霜冷皓月窺人深院靜孤鴻窗外
影情是相思深井恩是相思脩綆別後信音渾不
定銀瓶何處引

又

李蟻洲

花似匝兩點翠蛾愁壓人又不來春且恰誰留春一
霎消盡水沉金鳴寫盡杏牋紅蠟可奈薄情如此
點寄書渾不答

菩薩蠻

劉小山

去時滿地花陰月歸來落盡梧桐葉簾外小梅殘綠
窗幽夢寒明朝提玉勒又作江南客芳草徧長亭
東風吹恨生

又

許東溪

介三

西風又轉蘆花雪故人猶隔關山月金鴈一聲悲玉
腮雙淚垂繡衾寒不暖愁遠天無岸夜夜卜燈花

幾時郎到家

又

黃師憲

公度

高樓目斷南來翼
玉人依舊無消息
愁緒促眉端
不隨衣帶寬
萋萋天外草
何處春歸早
無語凭闌干
笙聲生暮寒

又

留積翁

元崇

江頭日落孤帆起
歸心拍拍東流水
山遠不知名
爲誰迢遞青
危橋來處路
尚帶瀟湘雨
楚尾與吳頭
一生離別愁

又

劉賔王

題花曾蘸花心露當初誤結丁香樹
往事小蠻窗新愁桃葉江
緩歌留薄醉急鞦人千里梅瘦月闌干
斷雲春夢寒

訴衷情

王篔洲蒼

補成團扇繡殘工並蒂瑞芙蓉花心欲就針折頰玉
唾殘茸尋斷緒怨西風寂寥中兩般時候舊月新
霜曉角昏鐘

阮郎歸

無名氏

薄羅生色畫醺醺醺滿架時隔池貪看燕爭泥墜
雙紅荔支銷金字晚唐詩夾紗團扇兒自遮微雨

傍花歸個情天得知

又

宋德廣

好風吹月過樓西樓前人影稀
杜鵑啼斷綠楊枝行人知不知
紅葉字斷腸詩從今懶再題
後園零落淡胭脂似君初去時

畫堂春

朱堯章

綠窗睡起小粧殘
玉釵低墮雲鬟回
紋衾寄見伊難
心緒闌珊
翠袖兩行珠淚
畫樓十二闌干
銷磨今古
霎時間恨殺青山

南鄉子

前人

花柳隔重扃送過秋千笑語聲檐鵲也嗔人起晚天
晴孤負東風趁踏青細細研紅綾小字相思寫不
成心上可人雲樣遠寒盟只恐恩情薄似雲

朝中措

王寧翁

玉

楊花繞晝暖風多晴雪點池波戲數翠萍幾靨零星
未礙圓荷軟人天氣半如溽暑半似清和說與香
篝緼火酒痕梅却衣羅

青門怨

此詞詞譜不載

月痕烟景遠思孤影舊夢雲飛離魂冰冷脉脉恨滿
東風對孤鴻翠珠塵冷香如霧人何許心逐章臺

絮夜深酒醒燭暗獨倚危樓爲誰愁

少年游

胡伯雨

曉鶯聲脆雨花乾倦枕夢初殘衣漬香留窗深紙暗
把鏡近檐看斷雲屢損溪橋柳花逕雪闌斑深倚
屏根閑敲詩字酒醒倍春寒

柳梢青

羅子遠

椅澗谷

萼綠華身小桃花扇安石榴裙子野聞歌周郎顧曲
曾惱夫君悠悠羈旅愁人似飄零青天斷雲何處
消魂初三夜月第四橋春

更漏子

仝前

晚潮生涼月細一抹遠山無蒂收越棹起吳橋人間
何限忙石頭城西北角杳杳天低鶻落渾不似此
波光清歌催夕陽

又

王敬子

夢期疎書約誤腸斷夜窗風雨燈暈冷漏聲遙酒
愁未消想天涯芳草碧人與芳春俱客憑杜宇向
江城好啼三兩聲

少年遊

趙君舉

曉山日薄半春陰烟暖柳昏金滿眼新晴歌聲粧影
悠蕩碧雲心閑庭客散人歸去疎雨濕羅襟樓閣

濛濛斷虹明處十里暮雲深

採桑子

前人

春蠶昨夜眠方起閑了羅機共採柔枝桑柘陰陰三月時
背人佯笑移金釧惆悵花期故故留遲獨自歸來雨滿衣

一叢花令

李蟻洲

梨花隨月過中庭月色冷如銀金闈平帖陽臺路恨
酥雨不掃行雲粧褪臂閑髻慵簪卸盟海浪花沉
洞簫清吹最關情腔拍懶溫尋知音一去教誰聽再
拈起指法都生天濶鴈稀簾空鶯悄相傍又春深

江城子令

譚在菴

嫩黃初染綠初描倚春嬌索春饒燕外鶯邊想見萬
絲搖便作無情終軟美天賦與眼眉腰短長亭外
短長橋駐金鑣繫蘭橈可愛風流年紀可憐宵辦得
重來攀折後烟雨暗不辭遙

漁家傲

全前

深意纏綿歌宛轉橫波停眼燈前見最憶來時門半
掩春不煖梨花落盡成秋苑疊鼓收聲颿影亂燕
飛又趁東風軟目力漫長心力短消息斷青山一點
和烟遠

又

石瑤林

春入桃腮生嫵媚妝成日日行雲意貪聽新聲翻歇
指工尺字窗前自品瓊簫試玉碾鸞釵珠結桂金
泥絡縫乾紅袂從把畫圖誇絕世金蓮地六朝未識
雙鴛細

眼兒媚柳

尹梅津

煥惟曉

裊裊垂楊蘸清漪明綠染春絲市橋繫馬旗亭沾酒
無限相思雲梳雨洗風前舞一好百般宜不知爲
甚落花時節都是顰眉

霜天曉角

范石湖

晚晴風歇一夜春堪折脉脉花疎天澹雲來去數枝
雪勝絕愁更絕此情誰共說惟有兩行低鴈知人
倚畫樓月

又

前廬人

少年豪縱袍錦圍花鳳曾是京城遊子馳寶馬飛金
鞵舊遊渾似夢鬢點吳霜重多少燕情鶯意都瀉
入玻璃甕

又梅

王子知

操

疎明瘦直不受東皇識留與伴春應肯干紅底怎著
得夜色何處笛曉寒無奈力飛入壽陽宮裏一點

點有人惜

又梅

樓考父

月澹風輕黃昏未是清吟到十分清處也不啻二三

更曉鐘天未明曉霜人未行只有城頭殘角說得

盡我平生

又桂

趙十洲

希彭清中

嫦娥戲劇手種長生粒寶幹婆婆千古飄芳草滿虛

碧韻色檀露滴人間秋第一金粟如來境界誰移

在小亭側

陽春白雪卷第七終

陽春白雪卷第八目錄

瑞龍吟

霓裳中序第一

沁園春

隔浦蓮近

玲瓏四犯

燭影搖紅

解連環

憶舊遊

氏州第一

一萼紅

雨淋鈴

塞翁吟

晝錦堂

風流子

風入松

宴清都

蘭陵王

念奴嬌

夜飛鵲二

解語花二

瑣窗寒

齊天樂二

眞珠簾

蘭陵王二

祝英臺近二

鶯啼序二

應天長十

滿庭芳二

梅子黃時雨

繞佛閣二

魚遊春水

風入松二

摸魚兒

桂枝香二

念奴嬌

沁園春二

醉蓬萊

永遇樂二

宴瑤池

西江月

四

踏莎行

憶秦娥

戀繡衾

南歌子

柳梢青

謁金門

長相思

					具林以	陳詩貴	懋德金	御廷	宴
						馬金	南	新	西

陽春白雪卷第八

臨濮 趙 聞禮 立之選

瑞龍吟

翁時靜

元龍

清明近還是遞趨東風做成花訊芳時一刻千金半
晴半雨酬春未準鴈歸盡離字向人欲寫暗雲難認
西園猛憶逢迎翠紈障面花間笑隱曲徑池蓮平砌
絳裙曾與濯香湔粉無奈燕幕鶯簾輕負嬌俊 青
榆巷陌蹋馬紅成寸十年夢秋千弔影鞞羅塵褪事
往憑誰問晝長病酒添新恨烟冷斜陽繫山黛遠曲
曲闌干凭損柳絲萬尺不如輕鬢

黃昇花庵詞選分
三段云此調前兩

段雙拽頭屬正平調後一段犯大石調結句仍屬正平調此選分兩段與周邦彥吳文英陳允平不同

霓裳中序第一

胡蒙泉

翼龍伯雨

江郊雨正歇燕子飛來人憶別未了殘梅怨結渺野
色波光春與天接相思遼濶怕柳風吹老吟髮關情
處滿汀芳草遮莫是鷓鴣時節一餉愁絕謾料理
新翻幾闕山尊堪共誰設夢到斷橋飛絮仍雪歲華
休省閱早霍地小園花發已辦著海棠開後獨立半
廊月

又

石瑤林

憑高快醉目翠拂遙峯相對簇千丈漣漪瀉谷愛溶

漾墜紅染波芬馥何人笑掬想溫泉初卸綃縠春風
蕩六宮麗質那日賜湯沐雙浴繡鳧飄逐恍記展
江南數幅而今鬢邊漸鵠阮洞音稀懶訪仙躅繫船
橋畔宿聽靜夜泠泠奏曲長安遠渭流香膩暗憶曉
鬟綠

沁園春

春寒

徐西麓

寶之

水榭春寒梅雪漫堦竹雲墮牆數花時近也採芳香
徑舊情著處看月西窗十二樓中玉妃臥冷嬾掬胭
脂放海棠層隄外渺歸鴻無數江樹蒼蒼席蓆夜
禮東皇剪蕙葉爲牋當綠章道杏晴三月等鶯啼曉

草烟萬里待鳩鳴芳九十日春三千丈髮如此愁來
白更長江南岸正柳邊無路沙雨微茫

隔浦蓮近

翁處靜

街檐插縹翠柳顚頓清明後淚蠟堆香徑一夜海棠
中酒枝上酸似豆鶯聲驟恨軟彈箏手 搵眉袖嘶
驄過盡平蕪綠襯飛繡沈紅入水漸做小蓮離藕亭
冷沈香夢似舊花瘦欲留春住時候

玲瓏四犯

全前

窗外啼鶯報數日西園花事都空繡屋專房姚魏漸
邀新寵葱翠試剪春畦羞對酒夜寒猶重誤暗期綠

架香洞月黯小階雲凍
算春將攬郵亭鞚柳成圈

記人迎送蜀魂怨染巖花色泥徑紅成隴樓上半揭

畫簾料看雨玉笙寒擁怕驟晴無事消遣日長清夢

此調創自周邦彥後段結句六字每句三字此詞六字一句與周詞異

燭影搖紅

海棠

同前

蜀錦華堂寶箏頻送花前酒妖嬈全在半開時人試
單衣後花面圍春競秀妬紅潮玉顚微透欲甦還墜
淺醉扶頭朦朧晴晝金屋名姝眼情空貯閒眉岫
世間還有此娉婷拚畫堂珠斗真豔可人消受倚鶯
催天香共袖冷烟庭院澹月梨花空教春瘦

解連環

劉葑房

晚雲粘濕正吳峯慘澹雨迷烟接早陡頓秋事分攜
甚連苑暮牆菊荒苔匝空濶愁鄉更天外怨鴻聲黯
怕吟肩易瘦料理篝衣細認香摺銀缸半明半滅
念花營柳陣何日消歇可是口凝黯蘭成爲情潤才
鬆麗賦多愜洛浦溟濛漫佇想明璫鈎襪告梧桐夜
深略住夢時一霎

又

黃雙溪

廷壽

乍寒簾幕愁燈花正結又還輕落弄瘦影瓶裏梅梢
爲誰綴隴頭向來新萼萬古千今算惟有別情難託

把潘郎髻綠盡付鴈聲幾度寥寞
扁舟暮江舊泊
記攜觴就折烟翠猶弱漫過却歌夕吟朝問天道何
時素織重握想得文姬近更苦雲衣香薄待更闌試
尋夢境夢回更惡

憶舊遊

同前

乍梅黃雨過徧倚層樓時舞垂楊暗綠知誰換似烟
濃霧薄望眼偏妨昔人畫鷁無數相引入橫塘縱細
切香蒲重開絳蕊懶向清觴
淒涼舊遊地謾賦減
蘭成才退周郎總把芳辰誤念紗窗深靜冰簟流光
鳳牋試寫新句青羽碧天長又隱隱城頭隨風斷角

斜照黃

氏州第一

鄭小山

開遍來禽春事過也江南倦客心苦料理花愁銷磨
酒病還是年時意緒寒淺香輕早一霎朝來微雨柳
曲聞鶯河橋信馬旋題新句漫道而今無賀鑄儘
腸斷滿簾飛絮說似風流除非小杜妙絕誇能賦黯
相逢俱有恨空流落江山好處猛拍闌干訴天知聲
聲杜宇

一萼紅

憶燕臺正倚簾吹絮小立望郎來擬管調絲塗粧綰

髻密意曾託蜂媒空恁誤
湔裙暗約最無奈好夢易
驚回想見而今淺顰雙翠沁
破粧梅沈帶悄然寬
盡恨年時行處紅糝蒼苔前
事重尋幽歡難偶鈿合
空委鸞釵這一點相思清淚
做心下煩惱幾時灰數
疊蠻牋怨歌忍對花栽

雨淋鈴

杜龍沙

窗影瓏璁畫樓平曉翳柳啼鴉門巷漸有新烟東風
定人掃桐花峭寒斗減看旅鴈爭起蒹葭遡斷雲多
少悲鳴數行又下遠汀沙應是故園桃李謝送清
江一曲闌干下染翰爲賦春羈嗟雙鬢客舍成華繡

鞭綺陌強携酒來覓吳娃聽扇底悽惋新聲醉裏翻

念家

此調始自柳永皆用仄韻此獨平韻起句又不押韻第五句四字一句此只三字七句六字八

句五字此四字一句七字一句與黃裳詞同後段起二句此詞又用仄聲叶六句七句只七字與柳詞不

合亦無他詞可校

塞翁吟

陳行簡

世之

遠碧秋痕瘦楚玉恨賦淒涼荷雨碎泣殘粧繫愁在

垂楊秋衣拂疊仙梔露裁雲刀尺猶香詩錦字獻明

璫肯容易相忘 思量空掩抑分宵緩枕終不敵涼

譙漏長自解珮蘭臯去後漸消滅香梅醞藉小杜疎

在年華駛水鬢影西風都付清觴

晝錦堂

孫花翁

薄袖禁寒輕粧媚晚落梅庭院春妍映戶盈盈回倩
笑整花鈿柳裁雲剪腰支小鳳蟠鴉聳髻鬢偏東風
裏香步翠搖藍橋那日因緣嬋娟留慧盼渾當了
匆匆密愛深憐夢過闌干猶認冷月秋千杏梢空闌
相思眼燕翎難繫斷腸牋銀屏下爭信有人真箇病
也天天

風流子

木樨

翁處靜

天濶玉屏空輕陰弄澹墨畫秋容正涼挂半蟾酒醒
窗下露催新鴈人在山中一片好秋花占了重換知

西風簫女夜歸帳棲青鳳鏡娥粧冷釵墜金蟲
湖花深窈閒庭砌曾占席地歌鐘載取斷雲歸去幾
處房櫳恨小簾燈暗粟肌消瘦帶爐烟滅珠袖玲瓏
三十六宮清夢還與誰同

又

李蟻洲

雙燕立虹梁東風外烟雨濕流光望芳草雲連怕經
南浦蒲萄波漲怎博西涼空記省淺粧眉暈軟罥袖
唾痕香春滿綺羅小鶯捎蝶夜留弦索么鳳求凰
江湖飄零久頻回首無奈觸緒難忘誰信溫柔牢落
翻墮愁鄉仗玉牋銅爵花間陶寫寶釵金鏡月底平

章十二主家樓苑應念蕭郎

又

利碧潤

梨園花柳地扶殘醉曾記問妖嬈歎惹往輕烟柔絲
未改霏零疎雨膩粉先飄更低道花無三日艷柳有
一年嬌卷翠未遲醉紅易失共偎香影同賞良宵

如今知何處三山遠雲水一望迢迢傍砌青鸞好在
誰送歸颿但花下紅雲尙通夕照柳邊白月自落寒
潮最是無端子規啼破寒梢

起句不用韻與周邦彥
楓林凋晚葉詞同惟後
段結句四字
句六字一句異

風入松

同前

斷蕪幽樹際烟平山外又山青天南海北知何極年
年是匹馬孤征看盡好花成子暗驚新笋抽林歲
華情事苦相尋弱雪鬢毛侵十千斗酒悠悠醉斜河
界白日雲心孤鶴盡邊天濶清猿咽處山深

宴清都

黃雙溪

墜葉窺檐語風簾薄遞來幽恨無數牙籤倦展銀缸
細剔悄然歸旅聲傳漏閣偏長更奈向瀟瀟亂雨想
近日舞袖翻雲吟牋度雪誰顧當時翠縷吹花東
城繡陌雙燕何許香羅唾碧晴紗印粉甚綠重靚藍
橋鎮隔芳夢念騎省悲秋漫賦待倚闌或遇賓鴻殷

勤寄與

蘭陵王

同前

絮花弱吹滿斜陽院落秋千外無數小舟綠水溶溶
帶城郭流光漫暗覺辜却鶯呼燕諾權遊地都在夢
中雙蝶翩翩度簾幕憑誰問康樂又粉過新梢紅
褪殘萼闌干休倚東風惡憐瑟韻空在鑑容偷改青
青洲渚徧杜若故交半寥寞漂泊鎮如昨念玉指
頻彈珠淚還閣孤燈隱隱巫雲薄奈別遽無語恨深
誰託明朝何處夜漸短聽畫角

念奴嬌

菊

安晚

楚天霜曉看老來秋圃寒花猶在金闕栽培端正色
全勝東籬風采雅韻清虛幽香淡泊惟有陶家愛由
他塵世落紅愁處如海多少風雨飄搖夫君何素
晚節應難改休道三閭曾舊識輕把木蘭相對延桂
同盟索梅爲友不復嬌春態年年秋後笑觀芳草蕭
艾

又

無名氏

李清照

蕭條庭院又斜風細雨重門須閉寵柳嬌鶯寒食近
種種惱人天氣險韻詩成扶頭酒醒別是閒滋味飛
鴻過盡萬千心事誰寄樓上幾日寒濃簾垂三面

閒拍闌干倚被冷香消清夢斷不許愁人不起清露
晨流疎桐初引多少遊春意雲高烟斂更看明日晴
未

夜飛鵲

胡蒙泉

皇橋度情處地久天長塵世無此匆忙纖雲淡蕩涼
蟾小家家瓜果錢唐愁人獨無那歎紫簫易斷青翼
難將返魂何在漫空留荀令餘香忍記穿針兒女
箒塵想都暗疊損衣裳誰念才情未減老來何遜少
日盧郎柳風荷露黯銷凝羅扇練囊更銀河曲曲玉
籤點點都是淒涼

又荷花

張船窗艾

霓裳按歌地涼影參差還是珮解江湄滄波正洗襪
塵恨流霞空沁銖衣盈盈半輪笑向朱闌凝佇欲訴
心期碧筒喚酒恐嬌娥來下瑤池未許西風吹斷
環步障千重鎮護金猊落晚文禽點鏡分香竊翠却
念幽羈綵雲驚散暗傷情不似芳時待清歌招些憐
心問的水杳舟移

解語花

同前

輕雷殷殷小枕驚回簾影搖庭戶嫩涼遙度江雲墮
結作西窗暗雨閒堦靜佇歎疎袂愁寬一縷憑畫闌

潤葉鳴條總是安秋處
因喚扁舟晚渡漸聞歌
招得采菱儔侶臨平歸路
花無數應識汀洲倦旅飛
紅怨暮長趁得斷鴻南浦
閒枕衾誰更無聊應最憐
素

瑣窗寒

黃雙溪

駐馬林塘還尋舊迹
雨收秋晚殘蕉映牖
強把碧心偷展
記相逢畫堂宴開
亂花影入簾初捲
正小池漲綠
絲綸曾試事隨鴻遠
淒斷情何限
料素扇塵深怨
娥碧淺清宮
麗羽漫有苔牋
題滿問低牆
雙柳尚存
幾時艷燭
親共剪但疑
眸數點遙峯
春色青如染

齊天樂

同前

十年漢上東風夢依然淡烟鶯曉繫馬橋空維舟岸
易誰識當時蘇小籌花鬪草任波浴斜陽絮迷芳島
笑底歌邊黛娥嬌聚怕歸早 京塵衣袂易染舊遊
隨霧散新恨難表燕子朱扉梨英翠箔留得春光多
少晴絲漫繞料帶角香銷扇陰詩杳細倚秋千片雲
天共渺

齊天樂

庚戌元夕都下遇趙立之

丁元隱黠

倦雲休雨風還作交相醒花蘇柳字滿吟灰痕添坐
席贏得新愁癡守歸期未有負小院移蘭故園嘗韭

謾道春來沈腰惟覺似秋瘦
燒燈時候是也楚津
留野艇會趁芳友問月賒晴憑春買夜明月添香解
酒口知別久悵帝陌論心客塵侵首戲鼓聲中舊情
猶在否

真珠簾

徐

落紅幾陣清明雨憶花期半被晴慳寒阻新柳著春
濃早翠池波妬粉雨香雲消息遠漫舊日秋千庭宇
凝佇正春醒簾外一聲鶯語塵鎖寶箏弦柱自眉
峯惹恨六么慵舞深院不成粧有淚彈誰與記得踏
青歸去後細共說花陰深處心悵怕當時飛燕知人

分付

蘭陵王

雨中登龜谿
乾元寺閣賦

曹松山

杏花坼烟柳藏鴉翠陌蘇隄上人正踏青嫩草茸茸
襯羅袂遊絲挂晴塔千里酣紅艷白秋千外嬌靨笑
春一片笙簫倚霞碧阿香妬傾國把鏡日深奩絲
雨愁織崇桃積李無顏色但蝶粉香漬燕泥芹冷紫
錢芳暈翳寶瑟悵還近寒食岑寂恨無極更酒驛
孤烟碁院長日梨花滿地春狼籍望鳳闕波渺燕樓
雲隔凭闌干晚吟袖濕但笑拍

祝英臺近

蘇竹里

結垂楊臨廣陌分袂唱陽關穩上征鞍目極萬重山
歸鴻欲到伊行丁寧須記寫一封書報平安 漸春
殘是他紅褪香收綃淚點斑斑枕上盟言都做夢中
看銷魂啼鴉聲中楊花飛處斜陽下愁倚闌干

又 木樨

張東之

潞

寶熏濃雲幄重瓊葉麗金葢黛綠蜂黃秋態未憔悴
繡簾深院黃昏著香無處人欲睡爲花重起 月如
水別有天外樓臺玲瓏異塵世翠袖生寒祇欠素娥
倚何如倩取西風吹將歸去爲添在廣寒宮裏

鶯啼序

徐西麓

鼎夫

荼蘼一番過雨灑殘花似雪向清曉步入東風細拾
苔砌餘靨有數片飛霑翠柳縈迴半著雙歸蝶悄無
人共立幽禽昵昵能說因念年華最苦易失對春
愁暗結歎自古曾有佳人長門深閉脩潔寄么弦干
言萬語悶滿眼欲彈難徹靠珠櫳風雨微收落花時
節春工漸老綠草連天別浦共一色但暮靄朝烟
無際盡日目極江北江南杜鵑叫裂此時此意危魂
黯黯渭城客舍青青樹問何人把酒來看別思量怎
向遲回獨掩青扉夕陽猶照南陌春應記得舊日
疎狂等受今磨折便永謝五湖烟艇只有吟詩曲塢

煎茶小窗眠月春還自省把融和事長留芳晝人間
世與羈臣恨妾銷離惻自題蕙葉回春坐聽蓬壺漏
聲細咽

應天長

蘇堤春曉

張梅深

集
成子

曙林帶暝晴靄弄霏鶯花未認遊客草色舊迎雕輦
蒙茸暗香陌秋千架閒曉索正露洗繡鴛痕窄費人
省隔夜濃歡醒處先覺重過湧金樓畫舫紅旌催
向段橋泊又怕晚天無準東風妬芳約垂楊岸今勝
昨水院近占先春酌恁時候不道歸來香斷燈落

又

平湖秋月

候蛩探暝書鴈寄寒西風暗剪綃織報道鳳城催鑰
笙歌散無蹟冰輪駕天緯逼漸款引素娥游歷夜粧
靚獨展菱花淡綉秋色人在湧金樓漏迴繩低光
重袖香滴笑語又驚棲鵲南飛傍林間孤山影波共
碧向此際隱逋如識夢仙遊倚遍霓裳何處聞笛

又 斷橋殘雪

鶖漸亘曉篙水漲漪孤山漸卷雲簇又見岸容舒臘
菱花照新沐橫斜樹香未北倩點綴數梢疎玉斷腸
處日影輕消休怨霜竹簾上湧金樓酒灑酥融金
縷試春曲最好半殘鳩鵲登臨快心目瑤臺夢春未

足更看取灑窗填屋灞橋外柳下吟鞭歸趁遊燭

又雷峯夕照

磬圓樹杪舟亂柳津斜陽又滿東角可是暮情堪剪
平分付烟郭西風影吹易薄認滿眼脆紅先落算惟
有塔起金輪千載如昨誰信湧金樓此際恁闌人
共楚天約準擬換樽陪月繒空卷塵幕飛鴻倦低未
泊門倒指數來還錯笑聲裏立盡黃昏剛道秋惡

又麴院荷風

換橋度舫添柳護隄坡仙題欠今續四面水窗如染
香波釀春麪田田處成暗綠正萬羽背風斜轟亂鷗

去不信雙鴛午睡猶熟
還記湧金樓共撫雕闌低
度浣沙曲自與故人輕別
榮枯換涼燠亭亭影驚艷
目忍到手又成輕觸
悄無語獨撚花鬚
心事曾卜

又 花港觀魚

岸容浣錦波影墮紅織鱗
巧避鳧唼禹浪未成頭角
吞舟膽猶怯湖山外
江海匝怕自有暗泉流
接楚天
遠尺素無期在誤停楫
四望湧金樓帶草帶烟縹
緲際城堞漸見暮榔敲
月輕舫亂如葉濠梁興歸未
愜記舊伴袖攜留摺指魚水
總是心期休怨三疊

又 南屏晚鐘

翠屏對晚鳥，傍占堤鐘聲。又斂春色，幾度半空敲。月
山南應山北，歡娛地空浪迹。謾記省五更聞得洞天
曉，夾柳橋疎穩。縱香勒前度湧金樓，笑傲東風鷗
鷺半相識。暗數院僧歸盡，長虹卧深碧。花間恨猶記
憶，正素手暗攜輕拆。夜深後，不道人來，燈細窗隙。

又柳浪聞鶯

翠迷倦舞紅，駐老粧流鶯。怕與春別過了，禁烟寒食
東風顛，鑲鐵遊人恨柔帶，結更喚醒羽喉。宮舌畫橋
遠，不認緡蠻晚棹空歇。爭似湧金樓，燕燕歸來鈎
轉暮簾揭。對語畫梁消息，香泥砌花屑。昆明事休更

說費夢繞建章宮闕曉啼處穩繫金狻雙鐙籠月

又 三潭印月

桂輪逼采菱沼漾金潛虬暗動鮫室水路乍疑霜雪
明眸洗春色年時事還記憶對萬頃葑痕龜坼舊遊
處不認三潭此際曾識 今度湧金樓素練縈窗頻
照庾侯席自與影娥人約移舟弄空碧宵風悄籤漏
滴早未許睡魂相覓有時恨月被雲妨天也拚得

又 兩峯插雲

暮屏翠冷秋樹赭疎雙峯對起南北好與霽天相接
浮圖現西極峩處雲共碧漫費盡少年遊屐故鄉

近一望空遙水斷烟隔
閒凭湧金樓漱灩波心如
洗夢淹筆喚醒睡龍蒼角盤空壯商翼西湖路成倦
客待倩寫素縑千尺便歸去酒底花邊猶自看得

滿庭芳

西湖

陳月境

借

嵐影浮春雲容口雨澄泓碧展玻瓈高低樓觀窗戶
舞漣漪別有輕盈水面清謳起舟葉如飛沙隄上垂
鞭信馬柳重綠交枝漸殘紅倒影金波漱灩弦筦
催歸看飄香陳粉滿路扶攜不盡湖邊風月孤山下
猿鳥須知東風裏年年此水貯盡是和非

又送春

同前

榆莢拋錢桃英胎子楊花已送春歸未成萍葉水面
綠紋肥沙暖溪禽行哺忘機處雛母相隨重簾靜銅
壺晝歇聲度竹間碁 人生如意少樂隨春減恨爲
情離怕牽愁勾怨漸近金徽浮世更相代謝江頭明
月渡口斜暉關情處摩挲釣石莫遣上苔衣

梅子黃時雨

張梅深

雲宿江樓愛留人夜語頻斷鐙炷奈倦情如醉黑甜
清午謾道迎薰何曾是簾紋成浪衣成雨茶甌注新
期竹院殘夢蓮渚 應誤重簾淒竚記并刀剪翠秋
扇留句信那回輕道而今歸否十二曲闌隨意凭楚

天不放斜陽暮沈吟處池草暗喧蛙鼓

繞佛閣

張船窗

渚雲弄濕烟縷際晚江國遙碧鴻過無迹怕聞野寺
孤鐘動淒惻小橋路窄疎袖暗拂衰草愁聽蛩語還
寂可堪過了龜紗負瑤席 苒荏露華白一夜秋窗
驚曉色柳影孤危殘蟬空抱葉想搖落關情歸夢頻
折物華消歇盡倒斷寒塘幽香先滅怨紅供拒霜啼

頰

調見清真樂府吳文英陳允平皆同前段六七八
三句每句四字第七句押韻此詞六字一句作兩

句與周
詞異

魚遊春水

趙聞禮

青樓臨遠水樓上東風飛燕子玉鈎珠箔密密鎖紅

藏翠

一作關翠

剪勝裁幡春日戲簇柳簪梅

一作花

元夜醉

閒憶舊歡暗彈

一作漫撩

新淚

羅帕啼痕未洗愁見同

心雙鳳翅長安十日

一作日

輕寒春衫未試過盡征鴻

知幾許不寄蕭娘書一紙愁腸斷也那人知未

風入松

昔年心醉杜韋娘曾格外疎狂綵牋預約西湖上共
幽深竹院松窗愁夜黛眉顰翠惜歸羅帕分香重
來一覺熟黃梁空烟浪茫茫如今眼底無姚魏舊遊
處都是淒涼入扇柳風殘酒點衣花雨斜陽

摸魚兒

朱雪崖

對西風鬢搖烟碧參差前事流水紫絲羅帶鴛鴦結
的的鏡盟釵誓渾不記漫手織迴紋幾度欲心碎安
花著蒂奈雨覆雲翻情寬分窄石上玉簪脆 朱樓
外愁壓空雲欲墜月痕猶照無寐陰晴也只隨天意
枉了玉銷香悴君且醉君不見長門青草春風淚一
時左計悔不蚤釵荆暮天修竹頭白倚寒翠

桂枝香

施翠巖

西風滿目漸院落悄清愁近銀燭多少蟲書墮翠又
隨波縠姮娥半露扶疎影向虛檐似知幽獨浦鴻聲

斷枝烏漏永芳夢難續
記舊日離亭細囑早歸趁
香邊頻泛醺醪誰遣而今對景黛娥雙蹙玉鞭但共
秋光遠漫空憐如許金粟露零襟冷蕭蕭更兼數竿
脩竹

念奴嬌

續雪谷

砌紅慵掃問東風應念西園寥落簾捲垂楊鶯轉巧
才見還因飛却撚指光陰關心節序總在秋千索翻
翻雙蝶傍人爭趁行樂 曾記步月歸來秦箏彈徧
共倚闌干角別後池亭誰鬪草多少芳游擔閣世事
升沈人生聚散俯仰空如昨餘香猶在繡幃清曉寒

薄

沁園春

陳行簡

睡起聞鶯捲簾微雨黃昏遞愁正青翰音斷離懷幾
摺碧雲暮合千里雙眸思發花前人歸鴈後誤記歸
帆天際舟渾無據但餘香繞夢頻到西樓風流翻
是花讐謾長遣眉山翠不流想哀箏繞指鴻移鳳咽
殘燈背泣玉沁春柔夜月精神朝陽微艷何處瑤臺
輕駐留愁無際被東風吹去綠黯芳洲

醉蓬萊

會稽蓬萊閣懷古

奚秋厓

又扁舟東下水樹青圓雨榴紅薄燕子愁多在重重

簾幕杖屨山陰而今休更問月尖眉約雙杏盟寒七
香珠墜歌塵飄泊莫倚危闌怨深黃竹一鶴歸來
亂峯飛落笑色凌波任霧抽烟邈飄渺生香地冷湘
水外片雲如削昨夜離人遊仙夢遠天風吹覺後段第七
句八句四字一句九句五字一句柳耆卿蘇東坡皆
如此填此詞六字一句三字一句四字一句與柳蘇
異詞

永遇樂

同前

一鴈斜陽亂蛩衰草天淨秋遠獨立西風星星鬢影
疑被蕖霜染蹇修何處秋深湘水隱約數峯青淺想
而今亭亭皓月共誰倚闌凄惋瑤箱翠襲玉奩云

剪暗裏淚花偷濺一日思量十年瘦削春色同眸減
瑯鸞好在文簫重許疊酒試香庭苑正銷魂餘霞散
碧暮鴉數點

宴瑤池

神仙詞

同前

紫鸞飛舞又東華宴罷歸步凝碧縹緲天風吹送處
泠泠珮聲清逸青童兩兩爭笑撚琪花半折羽衣寒
露香披翠幢珠輅去雲疾西真還又傳帝勅霞城
檢校問學仙消息玉府高寒有不老丹容自然瓊液
人間塵夢應悞認烟痕霧跡洞雲依約開時丹華飛

素白

宴瑤池卽八聲甘州句調
皆不合舊譜未知所本

西江月

徐桃渚 儼夫

曲折迷春院宇參差近水樓臺吹簫人去燕歸來空
有落梅香在 花底三更過雨酒闌一枕驚雷明朝
飛夢隔天涯腸斷流鶯聲碎

又

翁處靜

山色低銜小苑春雲暗宿空庭秋千無月冷雙繩閒
去畫闌人靜 一夜海棠如夢半窗銀燭多情好花
留不到清明日日陰晴無定

又

王花洲

往事星移物換舊遊雨冷雲沈眞娘墓草幾回青問

著寒潮不應 何處芙蓉別館依前楊柳離亭東風
吹淚入重扇爲喚香魂教醒

又

胡蒙泉

水霽芹香燕背林深風暖鶯吭一春心事錦機傍忘
却尋芳模樣 柳絮池塘晝午梨花院落昏黃闌干
曲曲是同腸倚到西廂月上

踏莎行

同前

合數冰蓮注情金葉臂痕猶記嗔時迹小樓幾箇月
黃昏荷香柳影都知得 問字燈深學書窗黑衣襟
詩卷留殘墨相思不抵藕絲長夢雲斷處吳山碧

又

照恨菱花剪情孤葉彩雲散後無蹤跡聽郎言語識
郎心當時一點誰消得柳暗花明螢飛月黑臨窗
滴淚研殘墨合歡帶上舊題詩如今化作相思碧

憶秦娥

翁處靜

三月時楊花飛盡無花飛無花飛不教春去爭得春
歸高樓望斷黃金羈綠窗眉黛傷新離傷新離好
將別後長做歸時

戀繡衾

同前

獸爐烟重火半焦捲簾時雪意又銷過數點殘鴉外

想梅花寒在灞橋。謝娘春恨深如柳，未東風先遣絮飄。且莫把冰絲剪有燈球，紅繡未描。

南歌子

胡蒙泉

山枕鶯聲曉，羽觴花片飛。昨朝猶道未成歸，不記春衫襟上舊題詩。愁眼垂楊見，苦心紅燭知。翻成怕見別離時，只寄一聲將息當相思。

又

眼媚雙波溜，腰柔一搦纖。問伊何事放珠簾，笑道篆香銷盡要重添。數日寬金釧，梳雲拂翠奩。梅妝依舊落虛檐，提起一春心事兩眉尖。

柳梢青

陳行簡

綠弱紅臞煖雲沁雨乍有還無破曉幽禽平渠流水
春響庭除梅酸初著花跗似滴滴新愁未舒幾信
花風一痕青燒萬里秦吳

謁金門

同前

歸未卜頻倒金彊纖玉明月綃窗停剪燭搗愁題蠹
綠秋水娟娟魚目腰素幾分銷縮接得雲牋無意
讀雕鞍何處宿

又

姚雪蓬

鋪

吟院靜遲日自行花影重透水沈雲滿鼎晚妝窺露

井 飛絮遊絲無定誤了鶯鶯相等欲喚海棠教睡
醒奈何春不肯

長相思

徐徑畝

聽鶯聲惜鶯聲客裏鶯聲最有情家山何處青
問歸程數歸程行盡長亭又短亭征衫脫未成

又 題甘樓

胡蒙泉

南山鐘北山鐘一聽鐘聲百念空古今昏曉中
望秋風數秋風等得秋來等過鴻燈前書一封

又

續雪谷

心悠悠恨悠悠誰剪青山兩點愁笙寒燕子樓
曉

星稀暮雲飛織就迴文不下機花飛人未歸

又

蘇雪谷

好風吹好風餘財來奔豈斷激前書一桂

南山於北山巖一葉餘輕自念空古今君與中

又

晴寒泉

福雲煇煇對翁志其學文既博辭鋒似未如

淵澄澗樹然結露寒欲橫雖許謝寒山吟風青

又

翁習理

劉奈阿春小首

此書卷

陽春白雪卷第八終

題下賞當味善裕樂商樂

陽春白雪外集目錄

賀新郎 七

滿江紅 十

念奴嬌

小梅花 三

沁園春 五

水龍吟

水調歌頭 八

賀新涼 四

玲瓏四犯

惜餘妍

宴山亭

桂枝香

沁園春

水調歌頭

陽春白雪外集目錄終

陽春白雪外集

臨濮 趙 聞禮 立之選

賀新郎

寄李伯紀

張仲宗

曳杖危樓去斗垂天滄波萬頃月流烟渚掃盡浮雲
風不定未放扁舟夜渡一鴈落寒蘆深處悵望關河
空弔影正人間鼻息鳴鼉鼓誰伴我醉中舞 十年
一夢揚州路倚高寒愁生故國氣吞驕虜要斬樓蘭
三尺劍遺恨琵琶舊語漫暗澁銅花塵土喚取謫仙
平章看過茗溪尙許垂綸否風浩蕩欲輕舉

又

送胡邦衡謫新州

夢繞神州路。悵西風、連營畫角。故宮離黍，底事崑崙
傾砥柱。九地黃流亂注。聚萬落、千村狐兔。天意從來
高難問。況人情、易感悲如許。更南浦、送君路。涼生
岸柳，催殘暑。耿銀河、疎星淡月，斷雲微霧。萬里家山
知何處。回首對牀夜雨。鴈不到、書成誰與。目盡青天
懷今古。肯兒曹、恩怨相爾汝。舉大白、唱金縷。

又

寄全甫

稼軒

把酒長亭說愛淵。明風流酷似卧龍。諸葛何處飛來
林間鵲。蹙踏松梢殘雪。要破帽、多添華髮。賸水殘山
無態度。被疎梅、料理成風月。兩三鴈也。蕭瑟。佳人

重約還輕別，悵清江天寒不渡水。深冰合路斷車輪，
生四角此地行人銷骨。問誰使君來，愁絕鑄就而今。
相思錯料當初費，盡人間鐵長夜笛莫吹裂。

又

許深甫 及之

舊俗傳荆楚，正江城梅炎藻夏做成。重午門艾釵符，
關何事付與癡兒。駮女耳不聽湖邊鼉鼓，獨炷爐香。
薰衣潤對瀟瀟翠竹，都忘暑時展卷誦騷語。新愁
不障西山雨，問樓頭登臨倦客有誰懷。古回首獨醒
人何在，空把清尊酌與漾。不到瀟湘江渚，我又相將
湖南去，已安排弔屈嘲漁父。君有語，但分付

又六月十五日
夜西湖月下

史邦卿

同住西山下是天地中間愛酒能詩之社船向西陵
佳處放塵世必無知者暑不到雪宮風榭楚竹忽然
呼月上被東南幾葉雲縈惹雲散去笑聲罷 清尊
莫為嬋娟瀉為狂吟醉舞無失晉人風雅踏碎橋邊
楊柳影不聽漁樵閒話便欲舉空杯相謝北斗以南
如此幾想吾曹便是神仙也問今夜是何夜

又吳中韓氏滄浪亭和吳夢窗韻

吳履齋

撲盡征衫氣小夷猶尊疊杖屨踏開花事邂逅山翁
行樂處何似烏衣舊里歎荒草舞臺歌地百歲光陰

如夢斷算古今興廢都如此何用灑兒曹淚
江南自有漁樵隊想家山猿愁鶴怨問人歸未寄語寒梅
休放盡留取三花兩朶待老子領些春意皎皎風流
心自許儘何妨瘦影橫斜水煩翠羽伴醒醉

又雪堂弔東坡

宋謙甫

喚起東坡老問雪堂幾番興廢斜陽衰草一月有錢
三十塊何苦抽身不早又底用北門摘藻儋雨蠻烟
添老色和陶詩翻被淵明惱畢竟是忘言好周郎
莫發人間少漫依然烏鵲南飛山高月小歲月堂堂
留不住此世何時是了算不滿英魂一笑我有豐淮

千斗酒把新愁舊恨都傾倒醉吹笛到天曉

滿江紅

稼軒

笳鼓歸來舉鞭問何如諸葛人盡道恁恁五月渡瀘
深入白羽風生貔虎嘯青溪路斷猩鼯泣早紅塵一
騎落平岡捷書急 三萬卷龍頭客渾未得文章力
把詩書馬上笑驅鋒鏑金印明年如斗大貂蟬却自
兜鍪出待勒公勲業上磨崖浯溪石

又

劉後村

金甲瑠戈記當日轅門初立磨盾鼻一搗千紙龍蛇
猶濕鐵馬曉嘶營壁冷樓船夜渡風濤急有誰憐猿

臂故將軍無功級 平戎策從軍什零落盡慵收拾
把茶經香傳時時温習生怕客談榆塞事且教兒誦
花間集歎臣之壯也不如人今何及

又

王東卿

八十歸來方崑下幾竿修竹柴門外沙鋪軟路水流
清玉栽接新來桃與李安排舊日松和菊過小橋作
箇看山樓干峯綠 收筆硯藏碁局酒莫飲經須讀
但平平放下頓超凡俗獨睡已無年少夢閒吟不唱
他家曲算人生萬事苦無多相將足

又

送李御帶琪

吳履齋

紅玉階前問何事翩然引去湖海上一汀鷗鷺半帆
烟雨報國無門空自怨濟時有策從誰吐過垂虹亭
下繫扁舟鱸堪煮拚一醉留君住歌一曲送君路
遍江南江北欲歸何處世事悠悠渾未了年光冉冉
今如許試舉頭一笑問青天天無語

又赤壁懷古

戴式之

赤壁磯頭一番過一番懷古想當時周郎年少氣吞
區宇萬騎臨江貔虎噪千艘列炬魚龍怒卷長波一
鼓困曹瞞今如許江上渡江邊路形勝地興亡處
覽遺踪勝讀史書言語幾度東風吹世換千年往事

隨潮去問道傍楊柳爲誰春搖金縷

又

潘紫崑

牻庭堅

築室依崖春風送一簾山色沙鳥外漁樵而已別無
閒客醉後和衣眠犢背醒來瀟茗尋泉脉把心情分
付隴頭雲溪邊石身未老頭先白人不見山空碧
約釣竿共把自慚鈎直相蜀吞吳成底事何如只抱
隆中膝漫長歌歌罷悄無言看青壁

又

循視江興水備舟中賦

陳可齋

萬里長江天與限東南吳楚何人者提英口口指鞭
欲渡孟德舳艫烟赤壁佛狸心膽寒瓜步問波濤說

盡幾英雄今猶古 中原地紛

又 和陳漕使仙湖韻

蕭大山

莫是西湖分一派殘波賸碧閒問著鶯仙丹事老榕
知得荇水帶長鷗踏損柳風絮暖魚吞入只前山依
舊漢時青晴還濕 亭疎好何消密花少好無多植
聽黃鸝三請要詩翁出消渴泉斟寒玉液留題石剝
蒼苔色歎而今翻羨口南春乾坤窄

又 烏衣園作

吳履齋

柳帶榆錢又還過清明寒食天一笑滿園羅綺滿城
簫笛花樹得晴紅欲染遠山過雨青如滴問江南池
館有誰來江南客 烏衣巷今猶昔烏衣事今難覓
但年年燕子晚烟斜日抖擻一春塵土債悲涼萬古
英雄迹且芳尊隨分趁芳時休虛擲

又

泛舟武夷午炊仙
游館次呂居仁韻

留雲巖

元剛

風送清篙泂流沂武夷九曲回首處虹橋無復幔亭
遺屋翠壁雲屏臨釣石銀河雪瀑飛寒玉想當年鐵
笛倚林吹秋空綠 蕞苒帶箝竹披荷芰餐椒菊
問丹崖碧嶺底堪重辱青笈不妨娛老眼烏鞞未許

污吾足恰仙遊一枕夢醒來胡麻熟

念奴嬌

中秋玩月山谷共倒金荷家萬里
難得尊前相屬之句悵然有懷借韻

首作一

程滄洲

曉涼散策恨西風不貸一池殘綠誰與冰輪撝玉斧
恰好今宵圓足樹杪翻光莎庭轉影零亂崑臺玉盪
胸清露閒須澆下醅醪 休問湖海飄零老人心事
似倚巖枯木萬里親知應健否脉脉此情誰屬世慮
難平天高難問倚遍闌干曲不妨隨寓買園催種松
竹

小梅花

賀方回

城下路淒風露今人犁田昔人墓岸頭沙帶蒹葭漫
漫昔時流水今人家黃埃赤日長安道倦客無漿馬
無草開函關掩函關千古如何不見一人閒 六國
擾三秦掃初謂商山遺四老馳單車致緘書裂荷焚
芟接武曳長裾高人端得酒中趣深入醉鄉安穩處
生忘形死忘名誰論二豪却不數劉伶

又

同前

縛虎手懸河口車如鷄栖馬如狗白綸巾撲黃塵不
知我輩不是蓬蒿人衰蘭送客咸陽道天若有情天
亦老作雷顛不論錢誰問旗亭美酒斗十千 酌大

斗起爲壽青鬢常青古無有笑嫣然舞翩然當壚秦
女十五語如弦遺音能記秋風曲事去千年猶恨促
攬流光繫扶桑爭奈愁來一日卽爲長

又

思前別記時節美人顏色如花發美人歸天一涯娟
娟姮娥三五滿還虧翠眉蟬鬢生離訣遙望青樓心
欲絕夢中尋卧巫雲覺來珠淚滴向湘水深 愁無
已奏綠綺歷歷高山與流水妙通神絕知音不知暮
雨朝雲何山岑相思無計堪相比珠箔雕闌幾千里
漏將分月窗明一夜梅花忽開疑是君

右三闕櫟括唐人詩歌爲之是亦集句之義然
其間語意聯屬飄飄然有豪縱高舉之氣酒酣
耳熱浩歌數過亦一快也

沁園春

寄稼軒

劉改之

斗酒彘肩風雨渡江豈不快哉被香山居士約林和
靖與蘇公命駕勒吾回坡謂西湖正如西子濃抹淡
粧臨照臺二公者都掉頭不顧只筦銜杯 白云天
竺去來圖畫裏崢嶸樓觀開看東西一澗縱橫水遶
兩山南北高下雲堆逋曰不然暗香疎影且向孤山
先探梅須晴去訪稼軒未晚且此徘徊

又御閱上郭帥

玉帶猩袍遙望翠華馬去似龍擁貂蟬爭出千官鱗
集貔貅不斷萬騎雲從細柳營開團花袍窄人指汾
陽郭令公山西將算韜鈴有種五世元戎 旌旗蔽
滿寒空魚陣整從容虎帳中想刀明似雪縱橫脫鞞
箭飛如雨霹靂鳴弓威撼邊城氣吞胡虜慘淡塵沙
飛北風中興事看君王神武駕馭英雄

又夢方孚若

劉後村

何處相逢登寶釵樓訪銅雀臺命厨人斫就東溟鯨
鱠圍人呈罷西極龍媒天下英雄使君與操餘子誰

堪共酒杯車千兩載燕南趙北劍客奇才
酒酣畫鼓如雷又爭信鄰鷄輕喚回數年光過盡功名未立
書生老去機會方來使李將軍遇高皇帝萬戶侯何
足道哉披衣起但淒涼念舊感慨興衰

又官滿作

雷春伯

問訊故園今如之何還勝昔無想舊耘蘭蕙依然蔥
蒨新栽楊柳亦已扶疎韭本千畦芋根一畝雨老烟
荒誰爲鉏難忘者是竹吾愛甚梅汝知乎茅亭低
壓平湖有狎鷺馴鷗尚可呼把絳紗準擬新官到也
寒氈收拾賤子歸歟略整柴門更芟草徑惟有幽人

解枉車丁寧著與做添碁局砌換茶鑪

又

用履齋多景樓韻

程滄洲

萬里飄萍送江入海過古潤州正羈懷無奈憑高縱
覽濛濛烟雨簇簇漁舟南北區分江山形勝憂憤令
人扶上樓沈凝久任斜飛雪片急灑貂裘英風追
想孫劉似黑白兩奩碁未收把烟霞饒與坡仙米老
丹青難覓摩詰營邱斗野號風海門殘照長與人間
筦領愁憑誰問借天河一挽洗甲兵休

水龍吟

答沈莊可

蕭鶴臯

人生何必求名身閒便是名高處卧雲衣袂何因自

染修塗塵土世路羊腸人情狙賦翻雲覆雨把從前
舊夢倚闌重省休更錯添淺注况是吾廬江上也
抵得封侯千戶高眠閒聽隣舟漁唱倚闌農語休望
當年溪邊俱載隆中三顧怕羣鷗微覺見人欲起背
人飛去

水調歌頭

甄龍友

西風新葉墮南國九秋初周天三百六十五度片雲
無上有迢迢河漢下有滔滔江水橫載洞庭湖一葉
放流去人在渾儀圖滿虛空張寶蓋綴明珠琉璃
爲地遊戲乾象駕坤輿爛醉蓬萊方丈遍入華嚴法

界試問夜何如北斗轉魁柄東海欲飛鳥

又送陳口之歸鎮州

蔡伯堅

東垣步秋水幾曲冷玻瓈沙鷗一點晴雪知我老忘
機共約經營五畝臥看西山烟雨窗戶舞漣漪雅志
易華髮歲晚羨君歸月邊梅湖底石入新詩飄然
東晉奇韻此道賞音稀我有一峯明秀尚戀三升春
酒辜負綠蓑衣爲寫倦遊興說與水雲知

又寄浩然

雲間貴公子玉骨秀橫秋十年流落冰雪香藹紫貂
裘燈火春城咫尺曉夢梅花消息蠶紙寫銀鈎老口

黃塵眼如對白蘋洲
世間物唯有酒可忘憂
蕭閒一段歸計佳處著
君侯翠竹江村月上
但要綸巾鶴
擎來往亦風流
醉墨薔薇露灑遍
酒家樓

又

榮樵仲

既難求富貴何處沒溪山
不成天也不容我去樂清
閒短褐寬裁疎葛柱杖橫
拖瘦玉著箇竹皮冠弄影
碧霞裏長嘯翠微間
醉時歌狂時舞困時眠
翛然自得了無一點俗相干
擬把清風明月剪作長篇短
闕留與世人看待倩月邊
女歸去借青鸞

水調歌頭

帥蜀作

崔菊坡

與之正子

萬里雲間戍立馬劍門關亂山極目無際直北是長
安人苦百年塗炭鬼哭三邊鋒鏑天道久應還手寫
留屯秦炯炯寸心丹對青燈搔白首漏聲殘老來
勲業未就妨却一身閒蒲澗清泉白石梅嶺綠陰青
子怪我舊盟寒烽火平安夜歸夢遶家山

又和吳秀嵩韻

程滄洲

駝褐倚禪榻絲鬢颺茶烟誰知老子方寸歷歷著千
年試問汗青餘幾一笑腰黃縈夢我自樂天全出處
兩無累羸取日高眠八千里西望眼斷霞邊弁蒼
苕碧隨分風月不論錢執手還成輕別何日歸來投

社玉海得同編經世付時傑
覓箇釣魚船

又

不能煩惱得掉臂便歸休
前度風檣這回潦
轍幾悠悠
幸得有雲一谷更自有書萬卷著甚麼
來由月采
混魚目霜口沈蠅頭
相山中候醉境將詩流情知
薄命天樣勲業也須收
辟邏世間萬事推放那邊一
壁百尺臥高樓
日月草頭露
天地水中漚

又

飲蕪湖雄觀亭

魏句濱

庭玉

璧月掛銀漢
冷浸一江秋天
公付我清賞
仙籍桂香
浮極目江山如畫
際晚雲烟凝紫
秋色豁羈愁
領看

上雄觀波影動簾鉤 鴈排空漁唱晚楚天幽湖陰
一曲千載成敗倩誰籌試問謫仙何處喚起于湖同
醉小爲作遨頭老子欲起舞擺脫利名休

賀新涼

送上官尉罷
官歸吳中

趙虛齋

滿酌蓬萊酒最苦是中年作惡送人時候一夜朔風
吹石裂驚得梅花也瘦更衣袂嚴霜寒透卷起潮江
高似屋甚扁舟泊在三江口明月冷載歸否 分攜
欲折無垂柳但重樓倚徙兩眉重皺浪濶天高無處
問萬事不堪回首况望斷孤鴻歸後玉樣松鱸一作
蓴絲
今正美想季鷹已自先招手須破戒飲一斗

又送靈山馬可
久通守潯陽

陸象澤家一作東

笛喚春風起向湖邊臘前折柳問君何意孤負梅花
立晴晝一舸淒涼雪底但小閣琴棋而已佳客清明
留不住爲匡廬只在家窗裏溢浦去兩程耳草堂
舊日談經地更從容南山北水庾樓重倚萬卷心曾
幾千古仰首駸駸紫氣正江上風寒如此且趁霜天
鱸魚好把貂裘換酒長安市明夜去月千里

又贈送行諸客

魏句濱庭玉

暮雨初收霽凭闌干一江新綠遠山凝翠漠漠春陰
添客思悵望天涯無際又猛省平生行止楚尾吳頭

多少恨付吟邊醉裏消磨矣浮世事只如此陽關
三疊徒勞耳也何須琵琶江上掩青衫淚一斗百篇
乘逸興要借青天爲紙兒輩詫龍蛇飛起今夜月明
呼酒處待明朝酒醒帆千里且爲我唱新製

又用俞國寶韻

洪平齋

誰識昂昂鶴且隨緣剩水殘山東村西落世事幾番
新局面看底却高三著况轉首西山日薄雪意壓檐
梅索笑任柄長柄短隣家杓筯小甕動孤酌見花
憶得年時昨正微醺獨步黃昏被花迷却冷月吹香
春弄影么鳳梢頭先覺恍夢斷羅浮山脚欲寄心期

無驛使想凌寒不奈腰肢約空凭暖畫闌角

玲瓏四犯

被召賦荼蘼

曹松山

遼

一架幽芳自過了梅花獨占清絕露葉檀心香滿萬
條晴雪肌素淨洗鉛華似弄玉乍離瑤闕看翠蛟白
鳳飛舞不筦暮烟啼鳩酒中風格天然別記唐宮
賜樽芳列玉蕤喚得餘春住猶醉迷飛蝶天氣乍雨
乍晴長是伴牡丹時節夜散瓊樓宴金鋪深掩一庭
香月

惜餘妍

被召賦二色木香

同前

同根異色看鏤玉雕檀芳艷如簇秀葉玲瓏嫩條下

垂脩綠禁華深鎖清妍香滿架風梳露浴輕盈便似
覺醪醖格調粗俗 蜂黃間塗蝶粉疑舊日二喬各
樣粧束費却春工鬪合靚芳儂馥翠華臨檻清賞飛
鳳葦休辭醉玉晴晝鎮貯春瑤臺金屋吳文英自度
曲四首名惜
秋華惟平仄不合換頭句五字押韻此六
字不押韻異第八句二字押韻此不押韻

宴山亭

被召賦玉繡球

同前

香月玲瓏柔風鏤刻嫩綠枝頭圓膩飛梭艷宇絮柳
池塘獨立萬紅塵外戲舞千團訝粉羽留連春媚非
是看滾雪拋瓊鏡鸞相倚 唐昌仙觀風流有霞洞
藏花紺鬢玉蕊雕闌占賞禁苑承恩難比太平瑤卉

遍插金瓶更移近寶猊烟翠堪愛只少箇鴛鴦繡帶

桂枝香

過溧水，感洋角哀，今伯州遺事。

鞠花翁

丁丁起處在縱牧九京經燒殘樹時見鳥鳶飢噪鶴
鷓妖呼數椽老屋團荒堵算何人瓣香來注淡烟斜
照閒花野棠棠當作草杳杳年度 世事幾番雲覆雨獨
此道嫌人拋棄塵土眼裏長青誰也解如山否三三
五五騎牛伴望前村吹笛歸去柳青梨白春濃月淡
蹋歌椎鼓

沁園春

夜登白鷺亭

施翠崑

披紫菟裘上白鷺亭看吹洞簫望長庚鯨過江橫素

練回仙鶴度月在青霄依約淮山清冷風露如到瀛
洲聽海濤浮圖近更玉鈴金鐸初奏琅璈 人間夢
境寥寥問故國繁華能幾朝有千年枯井龍沈鳳怨
數邱黃壤兔走猿嗥莫問榮華不如歸去短棹孤篷
乘夜潮翠崑下耕白雲二頃贖種仙苗

水調歌頭

甲辰皖山寄
治中秋招客

鄭雪巖

甫營亭子小花柳斬新栽衰翁餘暇何妨領客少徘徊
堪歎人生離合恰似燕鴻來往光景暗中催蘆荻
晚風起明月滿沙堆 去年秋如此夜有誰陪欲挽
大河無路滿眼總塵埃未了癡兒官事行止從來難

定又趣到蘇臺不作別離句共醉十分盃

陽春白雪外集終

陽春白雪

外集

十六